

中國全

名勝古蹟大觀  
續編



上海

大陸圖書公司印行

上海图书馆藏书



A541 212 0018 9753B



# 中華名勝古蹟續編目錄

## 第八編 江蘇

### 一 金陵

牛頭山 雞鳴山 馬鞍山 覆舟山 方山 金陵岡 白鷺洲 烏龍潭 樂遊苑 劉園 愚園 鳳凰台 夫子廟 靈谷寺 大報恩寺 景陽樓 冶城 朱雀橋 新亭 鐘亭 鐵貓 楊公剖心處 茅山 武歧山 周瑜故里 晉柏靈巖山 蒜山 圖山 馬蹟山 昭明選文 鶴林寺 玄妙觀 經山 練湖 玉乳泉 歸真觀 公園 齊梁諸陵 雲林 石墨池 芝山 青龍山 貞義女墓

### 二 滬海

紀念公園 也是園 遂吾廬 惠家園 九果園 小萬柳堂 學圃 宋園 松

中華名勝古蹟 第八編 目錄

一八——二五

中華名勝古蹟 第八編 目錄

二

社 徐光照墓 干山 佘山 崑山 醉白池 三賢祠 秀甲園 三高土墓

梧溪精舍 鎮洋山 古漪園 鶴槎山 雲翔寺 義兵巖 望海亭 茶山

三

蘇常

一一五—一四七

穹窿山 支硎山 寒山 華山 峇嶸山 銅坑山 龜頭山 真假山石 香雪

海 石壁 石樓 邾公鼎 石湖 練瀆 遂園 畱園 韓園 拙政園 黃堂

姑蘇臺 報恩寺 開元寺 堯峯寺 銅觀音寺 陸贄墓 韓世忠墓 丹井

馬鞍山 陽城湖 碩園 野鶴軒 鶯脰湖 垂虹橋 白雲溪 馬蹟山 公

園 避暑宮 天寧寺 清涼寺 太平寺 玄妙觀 東坡紫藤 錫山 管社山

梁溪 秦伯井 公園 胡園 點易臺 若冰洞 白雲洞 倪雲林故里 東

林書院 華孝子祠 張公山 石觀音 崇恩寺 龍池山龍 浮遠堂 薛畏齋

墓 狼山寺 曹頂墓

四

淮揚

四七一—五六

仙人洞 韓信城 漂母冢 枚乘故里 韓信釣臺 漂母祠 康山 瓜洲渡  
邵伯湖 古井 吳公臺 明月樓 石塔寺 梅花嶺 浮香寺 神居山 甓社  
湖 露筋祠

## 五

徐海

.....

五六—六一

寒山 峒山 漢高祖試劍石 荆山口石橋 快哉亭 曹操繫馬處 范增墓  
王陵母墓 霧豬山 丁公追漢祖處 聚仙山 龍岡山 天門寺 小華山 呂  
布射戟處 司吾山

中華名勝古蹟 第八編 目錄


# 中華名勝古蹟續編

## 第八編 江蘇

### 一 金陵

#### 牛頭山

牛頭山在江甯聚寶門外三十里。卽佛書所謂江表牛頭者也。山有二峯。東西相對。名曰雙闕。梁書何允曰。世傳晉室欲立闕。王丞相指牛頭山曰。此卽天闕也。因一名天闕山。又以山多洞壑。亦曰仙窟山。山高一百四十丈。周四十七里。山徑由麓起。有石磴數百級。杉檜行列。名天盤嶺。亦曰白雲梯。半霞和尚所創之普覺寺。卽在嶺上。寺左有白龜池。寺右有虎跑泉。唐塔則在寺後。更上爲觀音洞。後爲捨身巖。下有文殊洞。山後有池。梁昭明太子洗馬於此。因名洗馬池。此外更有獻花巖。三茅宮。辟支洞。石浮屠諸勝。



### 雞鳴山

雞鳴山在江甯覆舟山西二百餘步。本名雞籠山。寰宇記西接落星岡。北臨樓元塘。狀如雞籠。宋文帝元嘉時徵廬山處士雷次宗至建康。爲開館於雞鳴山。使聚徒教授。卽此。後齊武帝晨遊鍾山。射雉至此。始聞雞鳴。因改今名。明初於山巔築臺。置渾天儀。名觀象臺。故又曰欽天山。山有雞鳴寺。卽古同泰寺。寺前有施食臺。一名誌公臺。寺後有谿蒙樓。乃明憑虛閣舊址。又有北極閣。景陽樓二樓。皆可登眺。玄武湖又有覆舟池。中植荷芰。隄栽楊柳。夏時戾止。清曠宜人。全山景物較牛頭爲佳。

### 馬鞍山

馬鞍山在江甯清涼定淮二門之間。以山形如馬鞍。故名。高八十餘丈。與獅子山石頭城接連。有吉林寺。聽潮庵諸勝。

### 覆舟山



覆舟山在江甯太平門內。一名龍舟山。元和志、鍾山西足也。形如覆舟。故名。方輿勝覽、東連鍾山。北臨元武湖。宋元嘉中、嘗改名元武。建康志、山周三里。高三十一丈。山之東麓爲東陵。桓元使桓謙屯處。又東爲白朮坡。蘇峻被殺處。陳書、太建七年。甘露頻降樂遊苑。詔於龍舟山立甘露亭。即此。舊山有瑤臺、闔風亭、藏冰井。今荒廢不可究詰。惟陟岡遠眺。煙水蒼茫。樓臺高聳。城市全收。亦至可觀也。

### 方山

方山在聚寶門外東南四十五里。元和志、秦鑿金陵。以斷其勢。方山是所鑿之地也。其山四面等方孤絕。形似方印。又名天印山。晉元帝時、張闔自至方山迎賀。循宋元嘉末、何尚之請致仕。退居方山。明初敗陳瑊先於方山。皆即此。相傳吳葛仙翁嘗居此山。有石龍洗藥等池。今山有洞真觀、東霞寺。皆可遊觀。

## 金陵岡

金陵岡在盧龍馬鞍二山之下。龍灣路上。秦所鑿以斷王氣者。相傳即瘞金處。

## 白鷺洲

白鷺洲在江甯城西南八里大江中。宋曹彬伐南唐。嘗破其兵於此。唐李白詩「朝別朱雀門。暮宿白鷺洲。」「三山半落青天外。二水中分白鷺洲。」即謂此。

## 烏龍潭

烏龍潭在江寧城內。風景極佳。有小西湖之目。薛農慰有廬在其旁。水中有亭。顏曰何必西湖。

## 樂遊苑

樂遊苑在覆舟山南。宋書禮志。晉立北郊在覆舟山南。太祖以其地爲樂遊

苑。元嘉十一年。禊飲樂遊苑。范蔚宗樂遊苑應詔詩序曰。苑在宮城北三里。晉時芍藥園也。南史陳紀。太建四年。幸樂遊苑採甘露。今城北土橋南小教場。即其地。

### 劉園

劉園在江甯雨花臺畔。乃劉舒亭之別墅。一名又來園。據天成之形勢。加工之點綴。風景綦佳。中有又來堂。起雲樓。藏春閣。師竹軒。倚竹亭。茶廡。廊。檠。青閣。罷釣灣。訪橋。凌冰仙館。水月虛明堂。諸勝。

### 愚園

愚園在江甯城內。爲胡氏所築。因又名胡園。樓閣亭臺。竹林池石。布置頗工。而全園結構曲折。尤極清幽之致。有至正廳。水石軒。竹隴。棲雲閣。海棠春睡軒。諸勝。

### 鳳凰臺

鳳凰臺在江寧城西南隅。唐李白詩云：「鳳凰臺上鳳凰遊。鳳去臺空江自流。吳宮花草埋幽徑。晉代衣冠成古丘。三山半落青天外。二水中分白鷺洲。總爲浮雲能蔽日。長安不見使人愁。」清乾隆二十二年。高宗南巡。御製鳳凰臺詩。用李白韻並效其體。元薩都刺亦有詩云：「六朝歌舞豪華歇。商女猶能唱後庭。千載江山圍故國。幾番風雨入空城。鳳凰飛去梧桐老。燕子歸來楊柳青。白面書生同弔古。日陪驄馬繡衣行。」

### 夫子廟

夫子廟在江寧城內東牌樓文德橋。殊壯聲可觀。中爲大成殿。後爲明倫堂。尊經閣。右有青雲樓。孝弟祠。內有玉兔泉。外有大成泉。月牙池。

### 靈谷寺

靈谷寺在鍾山之陽。金陵紀。蔣山寺舊在山南。本名道林寺。梁武帝爲寶誌禪師建塔於玩珠峯前。名曰開善寺。宋曰太平興國寺。後爲蔣山寺。明移於

東麓。賜名靈谷寺。清康熙四十六年。聖祖南巡。賜御書聯額。乾隆十六年。高宗南巡。又賜御書聯額。當時紺宇琳宮。號稱第一。邇則已多頽圯矣。其下院。今爲大士庵。有觀世音像石。高廣各三丈許。光瑩可鑒。亦稱水晶屏。有孝感熊賜履書水晶屏三字勒於石。

### 大報恩寺

大報恩寺在江寧城南。吳大帝建。明永樂時重建。賜額。規模宏壯。有塔高百餘丈。清康熙時重修。聖祖高宗南巡。並登塔賦詩。賜御書匾額。黃之雋亦嘗登塔頂作詩云。一到眼無埃壒。蒼茫入素秋。萬家斜照外。千古大江流。金碧翔霄表。虬龍壓石頭。長安稱雁塔。此亦舊皇州。」

### 景陽樓

景陽樓在法寶寺西南。俗呼景陽臺。宋紀后妃傳。齊武帝永明中。置鐘於景陽樓上。應五鼓。及三鼓。宮人聞鐘聲。早起粧飾。

### 冶城

冶城在江甯城西。六朝事迹本吳冶鑄之所。因以爲名。晉太元中。謝安與王羲之登冶城。悠然有高世之想。卽此。金陵記。冶城卽今府治西北。朝天堂。楊吳之紫極宮。宋之天慶觀也。按朝天堂洪武中改。當時凡大朝賀。百官習儀於此。清乾隆二十一年。高宗南巡。賜御書匾額。

### 朱雀橋

朱雀橋在江寧城東南。卽朱雀桁。建康志。朱雀桁對朱雀門。南渡淮水。亦名朱雀橋。本吳南津大航橋。謝安置重樓。並二銅雀於橋上。因名。今鎮淮橋。其故所也。

### 新亭

新亭在江甯三山門外。晉書王導傳。過江人士。每至暇日。相要出新亭飲宴。周顛中坐而歎曰。風景不殊。舉目有江山之異。皆相視流涕。卽此。

## 鐘亭

鐘亭在江甯儀鳳門內北極閣旁。內懸明洪武二十一年造鐘一具。高一丈六尺。經七尺。周二丈一尺。重四萬六千斤。此鐘初半沒於土中。爲清江甯藩司許振禕所掘出。因建亭而懸之。其地乃明鐘樓故址。

## 鐵貓

鐵貓在江甯城內花牌樓鍾山書院後。有二具。相傳馬三寶下西洋故物。婦人撫摩之。謂可宜男。

## 楊公剖心處

楊邦乂剖心處在聚寶山北麓。有碣刻宋忠臣楊公剖心處。按楊公吉水人。建炎初。侂建康。金帥完顏宗弼兵至。守將杜充戰敗而降。公獨不屈。宗弼遣人說之。公以首觸柱。礎流血。大書衣裾曰。甯爲趙氏鬼。不作他邦臣。大罵乞死。宗弼怒。殺之。剖去其心。

### 茅山

茅山在句容縣東南。卽句曲山。高三十里。周百五十里。卽晉王廞慟哭處。梁書齊永明十年。陶弘景辭祿止於句容之句曲山。恒曰。此山下是第八洞宮。名金壇華陽之天。昔漢有咸陽三茅君得道來掌此山。故謂之茅山。山有九霄萬福宮。印宮。乾元觀。老虎洞。華陽洞。龍池。所謂龍池者。中有物四足五爪。方首扁尾。長可三寸許。色微青。脊有紅線。腹色丹而有光。陶弘景養龍子於池中。此卽所謂龍也。宋眞宗嘗敕中使取龍以進。尋送歸池。有觀龍歌刻於石。印宮至乾元觀。相距十數里。道盛林木。尤多松樹。陰翳蔽天。景殊清佳。且相近有數百年之古木焉。華陽洞卽第八洞。狹長幽奧。或云可通浙之吳山云。

### 武歧山

武歧山在句容縣。距滬寧鐵道之下蜀站東南六里許。山產蕙蘭。每屆春季。



花開香溢。遊者甚多。

### 周瑜故里

周瑜故里在高淳縣西二十五里。其宅以磚爲垣。周一里。俗呼爲磚牆周。

### 晉柏

晉柏在高淳縣立信鄉尋真觀內。相傳晉時許真君手植。大可十圍。枝葉繁茂而幹似枯朽。其根盤辟直上。而枝柯下垂。作攫拏狀。

### 靈岩山

靈岩山在六合縣東。巖巒層聳。四面如一。有偃月岩、白龍泉、馬腦澗。而馬腦澗產五色石。所謂靈岩石也。石有雲霞草木人物鳥獸之狀。甚至字畫天然。得者珍如瓊寶焉。

### 蒜山

蒜山在丹徒縣西九里。元和志、山多澤蒜。因以爲名。輿地紀勝、自古皆作蒜。

山。惟陸龜蒙題曰算山。或以周瑜與武侯議拒曹操謀算於此。故名。晉末孫恩浮海至丹徒。率衆登蒜山。劉裕擊破之。唐劉展叛。田神功將三千軍於瓜州。將濟江。復出騎萬餘陳於蒜山。卽此。宋蘇軾嘗遊蒜山。以松林可卜居。欲僦其地。地屬金山。乃作詩與金山元長老。詩云。一魏王大瓠無人識。種成何翅實五石。不辭破作兩大尊。只憂水淺江湖窄。我材濩落本無用。虛名驚世終何益。東方先生好自譽。孟賁子路并爲一。杜陵布衣老且愚。信口自比契與稷。暮年欲學柳下惠。嗜好醋鹹不相入。金山也是不羈人。蚤歲聞名晚相得。我醉而嬉欲仙去。旁人笑倒山謂實。問我此身何所歸。笑指浮休百年宅。蒜此幸有間田地。招此無家一房客。」

### 圖山

圖山在丹徒縣東北六十里。宋建炎三年。金人治舟師。欲由海道赴浙。詔遣韓世忠控守圖山。卽此。山多巖壑。形勢峻險。前爲龜山。右爲五峯山。右石仙。

朝陽、桃仙、鶴仙、蝙蝠諸洞。巔有寺。寺有塔。登塔遙眺。則金焦兩山、楊子海門。皆可一覽入目矣。

### 馬蹟山

馬蹟山在丹徒縣東南二十五里。以有青童君馬蹟故名。道書以爲第四十九福地。有青龍洞、黃龍洞、青龍洞、有石龍挂石罅。間有井曰葛洪井、黃龍洞有石泉。四時不竭。

### 昭明選文處

丹徒縣南七里招隱山。卽獸窟山。山上有招隱寺。寺有增華閣。世傳爲梁昭明太子選文處。山之西舊有泉。圓濺若貫珠。名眞珠泉。傳爲昭明所開。唐李廸嘗構亭其上。宋蘇軾詩所謂「巖頭匹練兼天淨。泉底眞珠濺客忙」。是也。此外又有虎跑、鹿跑二泉。

### 鶴林寺

鶴林寺在丹徒縣黃鶴山下。晉元帝大興四年建。劉宋改今名。寺中殿前有井。名寄奴泉。宋武帝微時所鑿。寄奴者武帝小字也。

玄妙觀

玄妙觀舊在丹徒縣石碓橋。俗呼東觀。卽唐紫極宮。元成宗元貞時改今額。有宋徽宗所賜永鎮福地金碑。及趙孟頫度人經石刻。

經山

經山在丹陽縣東北三十五里。相傳有異僧講經於此。一名金牛山。上有金牛洞。洞口僅容一人。其中甚廣。有石座平坦光瑩。彷彿碁枰。舊有崇教寺在山麓。卽經山院。寺前有銀杏一株。相傳寶誌手植。宋嘗於山置寨。曰經山寨。

練湖

練湖在丹陽縣西北。本名後湖。亦名練塘。晉郗鑒練兵於此。故名。分上下兩湖。清一統志。練湖形勢最高。上湖高下湖數尺。下湖又高運河數尺。勢若建

瓴幅員四十里。納長山諸水。以濟漕運。唐權德輿嘗宅於湖上。憶江南詩云。「結廬長占練湖春。」是也。

### 玉乳泉

玉乳泉在丹陽縣東北觀音山下。張又新煎茶水記。丹陽觀音山水第四。即此。山上有望湖亭。廣福寺。頗可遊觀。

### 歸真觀

歸真觀在丹陽縣東南七十里。舊名東膠觀。焦光煉丹處。有丹池。丹井。飛昇臺。迎仙橋。望仙墩。唐元宗開元時。改名清虛。宋真宗詳符時。乃改歸真。

### 公園

公園在丹陽城內。花木清幽。風景佳勝。並有齊梁諸陵及吳季札墓碑。

### 齊梁諸陵

齊梁諸陵。齊永安陵。在丹陽縣東北三十里。高帝父。追尊爲宣帝。高帝泰安

陵在丹陽縣東北三十一里。武帝景安陵在丹陽縣東三十二里。明帝興安陵在丹陽縣東北二十四里。梁建陵在丹陽縣東北二十里。武帝父追尊爲文帝。武帝修陵在丹陽縣東二十五里。唐貞觀十一年。詔令百步禁采樵。簡文帝莊陵在丹陽縣東二十七里。陸游曰。自常州西過呂城（呂蒙所築）又西北至陵口。距丹陽三十餘里。見大石獸偃仆殘缺。蓋南朝諸陵墓也。

### 雲林

雲林舊在金壇縣南八里西瑤村。明於玉德建。內有三十六泉。泉池山石巧嵌玲瓏。舊爲觴詠之地。

### 石墨池

石墨池在金壇縣西茆山。即菖蒲潭。世傳費長房學道於此。書符滌硯。澗池悉爲墨色。至今用池水合藥。往往有驗。

### 芝山

芝山在溧陽縣西八十一里。舊名小茅山。與溧水縣接界。建康志山中嘗產芝草。故名。上有洞十數。最著者曰梅仙洞。相傳梅福曾隱於此。洞前有觀音石。甚奇異。曰李子洞。有百沸泉。曰燕洞。有石如燕。曰仙人洞。有石秤碇子。曰天井洞。有竅通天如井。曰黃龍洞。乳水下滴。不沾人衣。山下有泉。泉水芳冽。大旱不涸。

### 青龍山

青龍山在溧陽縣北八十里。距金壇縣西南五十里。形勢如龍而青色。因名。山有洞穴。祈禱輒應。山半有洞曰青龍洞。洞前奇石森列。流泉漑漑。旁有峴曰牧門。洞口二尺許。其中平廣。石梁如帶。有堂臺簾籠。仙人掌之屬。皆以石狀得名。入祠稍深。有門曰隔凡。土人傳與金壇句容諸洞相通。

### 貞義女墓

貞義女墓在溧陽縣西北黃山。即春秋時史氏女墓也。伍子胥奔吳。至於瀨。

渚。女授以壺漿而自沈於河。唐李白有碑銘。舊有祠在縣北鳳皇橋。以明趙運使淮殉難。二妾翠蓮綠雲繪圖祔亭。顏曰貞烈。

## 一一 滬海

### 紀念公園

紀念公園在上海閘北虬江橋畔。中有花木橋亭之屬。殊清勝可觀。門前有亭曰紀念亭。誌築軍工路之落成也。園名即基於此。

### 也是園

也是園在上海小西門內凝和路。明天啓間喬煒建。即渡鶴樓遺址。至今已屢易其主。今名乃李氏所易也。園有湛華堂、育德堂、珠來閣、釣鰲處諸勝。而疊石穿池、迴廊水榭、殊饒林泉之趣。

### 遂吾廬

遂吾廬在上海謹記路。乃皖人程氏之家園也。幅員不廣。結構甚佳。引流作



沼。疊石成山。與衆不同。殊有雅致。

### 惠家園

惠家園在上海徐家匯西南漕河廟之南。園廣三十畝。多花木。頗堪悅目。惠雨亭所築。俗稱惠家花園。

### 九果園

九果園在上海曹家渡之西。以舊植九果樹故名。邑人吳文濤建。有望江樓。環江草堂。鬧紅畫舸。蘿補小築諸勝。

### 小萬柳堂

小萬柳堂在曹家渡。無錫廉泉隱居之所。中有樓曰帆影。閣曰翦淞。園曰南園。此外小溪花徑。竹屋球場。咸饒清趣。

### 學圃

學圃在上海靜安寺路。四明周氏別墅。西式建築。景物清幽。多花卉。尤多佳

種。

### 宋園

宋園在上海宋公園路。門額宋園二字。乃譚延闓書。園之中央。宋教仁石像在焉。像坐而作斜睨勢。像之下。石刻漁父二字。章炳麟書。背面石刻于右任題語。語曰。一先生之死。天下惜之。先生之行。天下知之。吾又何記爲直筆乎。直筆人戮。爲曲筆乎。曲筆天誅。於虜。九原之淚。天下之血。老友之筆。賊人之鐵勒之空山。期之良史。銘諸心肝。質諸天地。一像之後。即墓冢。巍然高聳。圓如覆碗。墓之兩畔。有共和二字。以泥砌成。外以花草圍之。墓後有小阜。栽松檜之屬。逾小阜更進。爲一廣圃。蒔菜蔬。中有宋夫人之墓焉。

### 松社

松社在上海徐家匯路。蔡鐸墓及祠堂在焉。松坡圖書館亦在其內。

### 徐光啓墓

徐光啟墓在徐家匯。其祠在太卿坊大街。光啟字子先。明上海人。萬曆進士。授庶吉士。歷贊善。崇禎初。以禮部尙書兼東閣大學士入參機務。卒於官。贈太保。諡文定。光啟嘗從意大利人利瑪竇學天文、算法、火器。盡通其術。與意人龍華民、鄧玉函、羅雅谷等修正歷書。生平譯著甚多。

### 干山

干山在松江縣西北三十里。機山東。相傳干將曾鑄劍於此。故名。又以山形似馬。名天馬山。舊上有二陸草堂。三高士碑。一柱石。半珠庵。八仙坡。雙松臺。看劍亭。留雲壁。濯月泉。餐霞館。稱干山十景。山下有鶴靜堂。來鶴亭。南園諸勝。又有菊莊。傳爲陶宗儀種菊處。

### 佘山

佘山在松江縣西北二十五里。舊傳有佘姓居此。故名。高三十餘丈。周十餘里。山多竹。產筍。笋香如蘭。清康熙四十八年。聖祖南巡。名曰蘭笋山。有東西

二峯望之穠郁深秀。明陳繼儒、施紹萃嘗隱此。今山有西人所築之教堂及天文臺。往時之招提蘭若、山莊草堂，咸不可觀。但猶有一浮圖，矗然存耳。

### 崑山

崑山在松江縣西北二十三里。長谷之東。陸機、陸雲兄弟皆有辭學。人以為玉出崑岡。故名。山形圓秀而潤。旁無附麗。望之如覆盎然。太平寰宇記：陸遜父祖墓在焉。山北有秦皇走馬塘。相傳始皇帝曾遊此。山南有大壩路。即秦皇馳道也。

### 醉白池

醉白池在松江縣城內。顧見山水部別墅也。額為王時敏手舉。處地幽僻。景物清閑。邑人往往觴詠於此。

### 三賢祠

三賢祠在松江縣城內。祀范仲淹、范履冰、范純仁。內有二陸像碑。像作晉人

衣冠高一尺三寸。寬二尺二寸。號綾錦墩碑。以此碑嘗歸綾錦墩野人。故名。

### 秀甲園

秀甲園在松江縣西塔街。卽明徐爾鉉宜園。入清歸王太傅瑣齡。康熙四十四年。聖祖南巡幸其地。時藤花盛開。御賜蒸霞二字。越歲復幸其地。瑣齡繪圖以紀。今已改爲陳忠愍公祠。

### 三高士墓

三高士墓在松江縣西北至山麓。三高士者楊維禎、陸居仁、錢維善也。

### 梧溪精舍

梧溪精舍舊在青浦縣青龍江上。元王逢避地之所。中有羅月山房、冥鴻亭、小草軒諸勝。逢自爲記。

### 鎮洋山

鎮洋山在太倉縣周二百步。明孝宗弘治十年。知州李端築。上有三峯及集

仙洞。舊建有迎春來仙遊仙三亭。祝允明有記。

### 古漪園

古漪園在嘉定縣南翔鎮。園有池沼竹木。風景清幽。夏日荷蕖盛開。消暑尤佳。有楠木廳。懸董其昌書華嚴墨海額。蓋此園本明關氏別業也。

### 鶴槎山

鶴槎山在南翔鎮北三里。舊有宋韓蘄王所築墩。今廢。土人每掘地得瓶。曰韓瓶。視爲古董。售之得善價。清王西莊學士詩「軍持掘得荒原裏。沽取春醪酒一杯。」卽咏此。

### 雲翔寺

雲翔寺在南翔鎮。舊名南翔寺。梁武帝時建。寺有八景。曰經幢石。梁朝井。植明檜。九品觀。雲臥樓。齊師鶴。博望槎。鶴跡石。今止存經幢石。而寺亦毀圮。惟山門外之二瓦塔及石埤在尙。

### 義兵砦

義兵砦在寶山縣江灣鎮。亦名鄉兵砦。宋高宗建炎時。嘗置鄉兵於此。韓世忠亦嘗駐軍。以擊金人。

### 望海亭

望海亭在寶山縣礮臺灣。清道光時建。高數丈。登頂遠眺。海水汪洋。盡入眼底。

### 茶山

茶山在崇明縣東北海中。一名蛇山。亦曰長山。有東西二峯。西峯頂有石。大數畝。羣松環之。南有呂純陽碑。

### 三 蘇常

#### 穹窿山

穹窿山在吳縣西南。山形如釵股。頂方平。廣可百畝。左思吳都賦。赤須蟬蛻。

而附麗。蓋指此山。上山過半山亭。顏曰第一靈山。又曰直山雲霄。由此更上有巨石一方。石有兩穴。相傳爲茅君禮斗處。穴卽其膝印也。穴有水。名雙膝泉。泉產石蟹。更上則有僧寺焉。崇宏壯麗。蔚然可觀。佛殿禪房。殆逾千間。此外更有法雨泉、百丈泉、柱杖泉、紫藤隴、讀書臺諸勝焉。

### 支硎山

支硎山在吳縣西南。晉支遁嘗居此。平石爲硎。山有平石。故山名支硎。而支遁以支硎爲號。東有觀音寺。又名觀音山。山有寒泉、石室、白馬澗、放鶴亭、馬蹟石諸勝。相傳觀音寺卽支遁道場。白馬澗爲支遁飲馬處。放鶴亭爲支遁放鶴處。

### 寒山

寒山在吳縣西。本支硎之支峯。明處士趙宦光嘗隱此。築小宛堂。後爲僧舍。庭前老樛。相傳宦光手植。芙蓉泉出其旁。西爲寒泉亭。清淺池千尺。雪飛魚



峽東南爲空谷。棕房石壁。馳烟驛。有篆書刻石。宦光舊迹也。清高宗南巡。屢次駐蹕其間。御賜聯額甚多。今荒廢湮埋。頗非舊觀矣。

### 華山

華山亦在吳縣西。晉太康中。生千葉石蓮華。因名。山半有池。又稱天池山。山峭拔聳秀。巖壑與虎邱靈巖相埒。有龜巢石。蒼玉洞。桃花洞等勝。又有石屋壁鑿佛像。

### 峯嶽山

峯嶽山在吳縣西南。形如獅子。因又名獅子山。山南有巨石。相傳爲墮星。吳地記。吳王僚葬此。山北爲何山。姑蘇志。故爲鶴阜山。以何求何點葬。此改名。

### 銅坑山

銅坑山亦在吳縣西南。一名銅井山。吳地志。銅山有銅坑十餘穴。深者二十

餘丈。淺者六七丈。左思吳都賦所謂採山鑄錢者也。姑蘇志在鄧尉山西南。相傳晉宋間鑿坑取沙土煎之。皆成銅。故名。山上有巖洞。其懸溜。匯而爲池。清甘不竭。名曰銅泉。

### 龜頭山

龜頭山在吳縣西南。洞庭之支嶺也。產青石。有天然玲瓏者。謂之花石。宋徽宗時采貢。故有花石綱。又一種色白而潤溫。堪爲玩具。號爲玉石。又有胎斑而光澤者。可充硯。墓山有厓突出如龜首。故名。登其上觀太湖。烟水蒼茫。氣象萬千。風景至佳。

### 真假山石

真假山石在吳縣西南玄墓山。晉青州刺史郁泰玄墓畔。明天順間現於土。後漸湮沒。清康熙十七年復出。此石玲瓏奇巧。宛似花園中之假山。實則非製自人工。而由於天然。因名曰真假山石。亦有洞。康有爲刻壽。

洞二字於其上。

### 香雪海

香雪海在吳縣西南吾家山。山盛植梅。花時一望如雪。香風度十餘里。清康熙時巡撫宋犖題香雪海三字。鐫於厓壁。相近有石作梅瓣狀。卽往時梅花亭柱石。又有御碑一方。仆臥於地。蓋康熙二十八年。聖祖南巡。嘗幸此觀梅花也。

### 石壁

石壁在吳縣鄧尉之蟠螭山頂。奇峭峻拔。大可數畝。有殿宇曰東湖精舍。又有望湖臺。可觀太湖。遊步到此。令人發清曠之思。

### 石樓

石樓距石壁可數里。有古刹。趙寒山題石樓二字。此處俯觀梅花。勝於香雪海。蓋紅綠白諸梅。皆可一覽入目也。

### 邾公鼎

邾公鼎藏於鄧尉聖恩寺。古色斑斕。作扁圓形。昔嘗爲劣僧售去。得潘祖蔭贖還。祖蔭題跋曰。邾公鼎。邾公徑。俱見春秋經。阮氏釋邾爲周。誤矣。余見邱印川隅天閣遺著。乃知聖恩寺有是器。同治甲戌。求之不可得。今乃假得拓一本。而仍以原器歸之寺。大江以南。無專鼎在焦山。王子吳錮在虎邱。與此鼎峙而三矣。云云。此外又有文殊指南圖。一蒲團外。萬梅花圖。咸有名人題詠。與邾公鼎稱三珍焉。

### 石湖

石湖在吳縣西南。輿地紀勝。范蠡所經入五湖者。有茶磨諸峯映帶。頗爲勝絕。宋參政范成大因越來溪故址。小築臺榭。孝宗書石湖二字。賜之。因自號石湖。中有千巖觀。天鏡閣。玉雪坡。盟鷗亭等迹。又有巨石刻大士像。今諸勝多有湮沒不可尋者。清高宗南巡。泛舟湖中。御書石湖二字。鐫於厓壁。

練瀆

練瀆在吳縣西南。唐皮日休詩：「空濶嫌太湖。崎嶇開練瀆。三尋鬻石齒。數里穿山腹。」卽咏此。

遂園

遂園在吳縣申衙前。畢秋帆建。今屬劉姓。舊名慕家花園。園有池。池盛荷蕖。每屆夏時。香風四溢。清雅宜人。

留園

留園在吳縣。昆陵盛氏業也。有小天竺、二沿紅橋等勝。亭堂花木。頗具園林之勝。

韓園

韓園在光福鎮峙淹嶺下。有清彭玉麟墨梅畫壁。舊時逍遙隔、迴波榭、心月山房諸勝。近頗頹圯。

### 拙政園

拙政園在吳縣齊婁二門間。初本大弘寺。明嘉靖時，御史王獻臣改爲之。文徵明有拙政園圖。記清初歸海昌陳之遴。後籍沒爲駐防將軍府。繼又爲吳三桂壻王永寧邸舍。康熙時，又改爲蘇糧道署。缺裁散爲民居。後又歸郡人蔣氏。名曰復園。熹慶未，又歸武林吳氏。屢易其主。今又改爲八旗奉直會館矣。當時茂梅曲池。勝甲吳下。舊有連理室。珠山茶樹。花開之際。爛紅悅目。吳偉業有山茶花歌。歸蔣氏時。蔣氏時會親友於園。洞庭葉芳林爲之作復園嘉會圖。王次山爲之記。

### 黃堂

黃堂在吳縣。吳郡志。春申君子假君之殿也。後太守居之。數失火。塗以雄黃。遂名黃堂。即今太守正廳是也。天下郡治皆名黃堂。仿此。

### 姑蘇臺

姑蘇臺在吳縣西南三十里橫山西北姑蘇山上。一名晉臺。吳地記闔閭造此。經營九年始成。子胥諫夫差不聽。曰：「吾見鹿豕遊姑胥之臺也。」卽此。唐李白詩云：「舊苑荒臺楊柳青。采菱歌唱不勝春。只今惟有西江月。曾照吳王宮裏人。」五代羅隱詩云：「讓高泰伯開基日。賢見延陵復命時。未會子孫因底事。假崇臺榭爲西施。」明張羽詩云：「荒臺獨上故城西。輦路淒涼草樹迷。廢冢已無金虎踞。壞牆時有夜烏啼。采香逕斷來麋鹿。響屐廊空變蒺藜。欲弔伍員何處是。淡煙斜日不堪題。」

### 報恩寺

報恩寺在吳縣城北。本吳通元寺。唐改爲開元寺。吳越爲報恩寺。今稱北寺。吳地記通元寺吳大帝孫權吳夫人捨宅置。續圖經開元中詔天下置開元寺。遂改名開元。同光三年吳越錢氏更造。移支硎山報恩寺額於此。梁僧正慧造浮圖於中。凡十一層。宋蘇軾捨銅龜以藏舍利。宋建炎四年。權兵燹。寺

塔俱燼。紹興間再剏。止九層。登塔遠眺。可觀全城。

### 開元寺

開元寺在盤門內。同光三年錢鏐建。清咸豐十年燬。同治十一年重修。乾隆二十二年高宗南巡幸焉。舊有晉時浮海來二石像及佛鉢。梁簡文有石像銘。唐皮日休有佛鉢序。

### 堯峯寺

堯峯寺在吳縣橫山西南。本名免水院。後改曰堯峯。舊有十景。曰清輝軒、碧玉沿、多境巖、寶雲軒、白龍洞、觀音巖、偃蓋松、妙高峯、東齋、西隱等。

### 銅觀音寺

寺在吳縣龜山。宋仁宗康定元年大旱。民迎銅觀音像祈雨。輒應。寺後有浮圖。梁時建。

### 陸贄墓



陸贄墓在吳縣齊門外六里官河之西。地名陸墓。贄字敬輿。唐嘉興人。德宗時爲翰林學士。甚親任。號稱內相。從幸奉天日。詔書旁午。皆出贄手。武夫悍卒。聞者莫不感泣。思奮累遷中書侍郎同平章事。爲裴延齡所讒。貶忠州別駕。在朝論諫甚切。一本於仁義。卒諡宣公。所著有奏議翰苑文集。

### 韓世忠墓

韓世忠墓在靈岩山西。有石碑。孝宗御題中興佐命定國元勳之碑字樣。碑高三丈六尺。闊七尺二寸。相近有祠。祠多碑刻。有陳鑾聯云「高冢臥麒麟。回首感六朝風雨。神絃彈霹靂。歸魂思一曲滄浪。」接世忠字良臣。延安人。從高宗南渡。與岳飛合力拒金人。戰功甚偉。累官京東淮南宣撫處置使。孝宗時追封蘄王。諡忠武。

### 丹井

丹井在常熟縣治致和觀後。相傳井有藏丹。宋治平中。道士李正則浚井。得

藏石丹篋。啓之化爲雙紅鶴。飛入尙湖。因又名鶴井。明宋濂嘗撰銘勒井上。

### 馬鞍山

馬鞍山在崑山縣城內。高七十丈。山產石。玲瓏纖巧。號崑山石。價值甚昂。山上有一線天。桃源洞。凌霄塔。落星潭。鳳凰臺。曇華亭。華藏寺諸迹。一線天壁上。有片雲穿石峽。飛浪到天門十字。桃源洞深杳幽邃。相傳可通常熟山。落星潭有一巨石。圓而色青。傳爲落星所化。山麓又有劉龍洲墓。黃太常墓。及公園焉。

### 陽城湖

陽城湖在崑山縣西北三十五里。通志。陽城湖所納之水。凡十。視諸湖蕩爲大。東爲巴湖。傀儡湖。二水與陽城合而爲一。又東爲巴城湖。北爲鰻驪湖。施澤湖。全湖汪洋浩蕩。風景頗佳。世所稱陽城湖蟹。卽產於此。

### 碩圓

碩圓在崑山縣留暉門外卽明王澄川頤圓。有萬竹樓、聽松閣、清蔭堂、雪舫等勝。

### 野鶴軒

野鶴軒在馬鞍山東南。宋劉過建。明崑山令楊子器重修。歸熙甫嘗會文於此。有野鶴軒壁記。文曰：「嘉清戊戌之春，余與諸友會文於野鶴軒。吾崑之馬鞍山小而實奇。軒在山之麓，旁有泉，芳冽可飲，稍折而東，多盤石，山之勝處。俗謂之東厓，亦謂劉龍洲墓。以宋劉過葬於此，墓在亂石中，從墓中仰視，蒼碧嶙峋，不見有土，唯石壁旁有小徑，蜿蜒出其上，莫測所往，意其間有仙人居也。始慈谿楊子器名父，剏此軒，令能愛文好士，不爲俗吏者，稱名父。今奉爲名父祠。嗟夫，名父豈知四十餘年之後，吾黨之聚於此耶？時會者六人，後至者二人。潘士英自嘉定來，汲泉煮茗，翻爲主人。余等時時散去，士英獨與其徒處。烈風暴雨，厓崩石落，山鬼夜號，可念也。」今改爲柳堂先生祠。

鶯脰湖

鶯脰湖在吳江縣西南。其源自天目東流至荻塘。會爛溪水。併出平望。匯於此。其形似脰。故名。或訛爲鶯門湖。俗又呼杏登湖。湖中有平波臺。九華寺。八慵園等迹。水光蕩漾。風景至佳。

垂虹橋

垂虹橋在吳江縣東。本名利往橋。蘇舜欽詩。長橋跨空古未有。因又名長橋。宋慶歷八年建。構亭其上。曰垂虹亭。宋蘇軾自杭移高密。嘗與張子野等。月夜置酒亭上。吳郡志。吳江利往橋。有亭曰垂虹。而世並以名橋。輟耕錄。吳江長橋七十二洞。元泰定二年。蟄以石。宋鄭毅詩云。一三百蘭干鎖畫橋。行人波上踏瓊瑤。插天蟠螭玉腰闊。跨海鯨鯢金背高。路直鑿開元氣白。影寒壓破大江豪。此中自有銀河接。不必仙槎八月濤。

白雲溪

白雲溪在武進縣唐家灣。源自溧陽流入。卽荆溪之上源。舊時頗擅煙水之勝。溪北有畫閣及白雲古渡坊。往時每屆端午。龍舟競渡於此。

### 馬蹟山

馬蹟山在武進縣東。其西麓曰西青。石壁峭立。多石窟。圓如馬跡。因名山。有葛仙井。深可四尺。寬可二尺。相傳葛稚川煉丹於此。

### 公園

公園有二。一在武進城內雙桂坊。曰第一公園。舊爲延陵季子祠。中有落星石。一在新西門內。舊爲白龍庵。曰第二公園。二園皆有亭臺花木。而第二公園風景尤佳。城內公園路有圖書館。亦有花木之勝。

### 避暑宮

避暑宮在馬蹟山之內閩灣。世傳吳王闔閭避暑之所。今其井尙存。

### 天寧寺

天寧寺在武進縣東。唐建。紺宇琳宮。巍峨壯麗。郡叢林之巨擘也。清乾隆二十七年高宗南巡。嘗頒御書聯額。寺有塵外樓。九蓮閣。風景綦佳。

### 清涼寺

清涼寺在武進縣大南門外。有明代藏經。處地幽靜。夏時多有往寺避暑者。

### 太平寺

太平寺在武進縣城外。寺壁舊有清濟貫河圖數十丈。極雄奇壯偉之致。乃郡人徐友手筆。寺後有塔七級。

### 玄妙觀

玄妙觀在武進縣東南。宋名天慶。元改今名。中有梅樹。尤多修篁。遊行其中。令人生清曠之思。舊有畫龍壁。相傳爲仙人李懷仁遺蹟。

### 東坡紫藤

東坡紫藤在武進縣東門內。駸岸湯宅東院。其根在西院。中隔大廳三楹。相

傳係蘇東坡手植。

### 錫山

錫山在無錫縣。與惠山連麓。唐陸羽《惠山記》：山東峯當周秦間，大產鉛錫，故名錫山。漢興錫方殫，故創無錫縣。王莽時錫復出，改縣名曰有錫。後漢有樵客於山下，得銘云：有錫兵天下爭，無錫清天下寧。有錫沴天下弊，無錫又天下濟。自光武至孝順之世，錫果竭。順帝更爲無錫縣，此錫山名所由始也。宋聶厚載《無錫縣治記》：樵客得銘，合在文景之世。是時弭師偃革，天下清宴，故神靈薦祉，其銘出矣。因之，剟縣宜彰其美。陸云：後漢得銘，非也。清乾隆十六年，高宗南巡，幸焉。今山有于忠肅廟、龍光寺、龍光塔、石浪禪院、麻姑池等。

### 管社山

管社山在無錫縣西。前瀕震澤，後引漆湖。山麓有萬頃堂，額爲楊翰西書。臨窗遙望，風景絕佳。堂多聯語，如「天浮一壺出，山挾萬龍趨」，「如上岳陽」。

樓對萬頃湖光。重憶希文椽筆。遙瞻於越界。指一帆風影。可來范蠡扁舟。等堂右有虞王廟。廟旁有虞美人厓。清初高士楊紫淵墓。祠及其隱居之楊園。亦在山麓。

### 梁溪

梁溪在無錫縣西。源出慧山。相傳古溪極隘。梁大同中重浚。故名。或以梁鴻居此而名。遊太湖必經此道。中流有仙蠡墩。世傳范蠡載西施入湖泊舟處。

### 處泰伯井

泰伯井在無錫縣梅里鎮。相傳吳泰伯宅居於此。舊有泰伯城。城周三里。

### 公園

公園在無錫縣城內。就崇安寺黃松院禪房隙地爲之。共和二年建。占地甚廣。有涵碧橋紀念塔等。花木繁茂。風景清佳。西南隅有一古樹。大可十圍。則數百年物也。



## 胡園

胡園在無錫慧山尊賢祠旁。中多桂樹。有雲外天香閣。又有假山。山有石公墮履處。

## 點易臺

點易臺在慧山麓明邵寶讀書處。厓壁則有點易臺三字。寶字國賢。號二泉。咸化進士。知許州。累官禮部尙書。卒諡文莊。寶質性淳懿。學問博洽。孝親睦族。獎誨後進。應務之才。細巨皆適。一時儒碩。並以天下士稱之。

## 若冰洞

若冰洞在慧山第二泉上。爲唐僧若冰刷巖而得。故名。亦名北巖洞。洞中深杳。相傳可通宜興張公洞。洞下有泉。曰若冰泉。

## 白雲洞

白雲洞在慧山石門下。洞爲一小龕。奉呂祖像。龕畔石上刻有篆文白雲深。

處四字。每字徑可八寸。字畔尙有其他石刻。頗模糊不可辨識。

### 倪雲林故里

倪雲林故里在無錫梅里鎮。舊有雲林草堂、朱陽堂、清祕閣等。雲林字元鎮。號雲林。元無錫人。強學敦行。工詩善書畫。所居幽迥絕塵。藏書數千卷。手自勘定。古鼎名琴。陳列左右。自號雲林居士。性好潔。盥濯不離手。俗客造其廬。去輒洗滌其處。張自誠鉤致之。逃以免。明太祖召之不起。人稱無錫高士。所著有清閼閣集等。

### 東林書院

東林書院在無錫縣治東。宋楊時講學處。明顧憲成、顧允成、高攀龍輩復講學其中。攀龍榜其門曰東林院。屢毀屢修。清光緒間改爲小學校。門前有東林舊跡坊。

### 華孝子祠

華孝子祠在惠泉左。唐時立。即孝子宅址。舊有遺蔭樹。成志樓。承澤池。溯原等遺跡。又有龜池。池有二石螭。一吐一納。壁有文徵明隸書石刻。孝子名寶。父豪。義熙末。成長安。時孝子年才八歲。豪謂之曰。我還爲汝冠。後長安陷。豪死。孝子年至七十不冠。亦不婚。或問之。不忍答。輒號慟。彌日。齊高帝建元三年。詔表其門閭。今祠中塑像童髻而長鬚。蓋存其真也。

### 張公山

張公山在宜興縣東南。山有洞。相傳張道陵居之。因以名山。山高六十仞。周五里。洞深五十餘仞。北向一竇。廣踰四尋。遊者秉炬達燒香臺。可坐百人行。約三里。南望小洞通徹。道書第五十八福地也。洞後有白馬洞。白鶴洞。皆有水出。合流入罨畫溪。西南曰佛窟洞。有玉女潭。入西南三里許。曰天窟洞。有龍湫。又西一洞。凡三穴。卽君陽洞也。

### 石觀音

石觀音在宜興縣黃家山之棲雲寺。高可丈餘。立於鰲首。左右有善財龍女像。皆神采生動。雕琢極精。

### 崇恩寺

崇恩寺在宜興縣磬山。有御書樓。藏明板經冊七十餘卷。又有天隱僧洗鉢池。深僅尺許。不涸不溢。全山多竹。箐箐萬個。翳蔽天日。

### 龍池山龍

宜興縣西南龍池山。有龍池。中有物如句容茅山龍池。中物相類似。惟前二足四爪。後二足五爪。爲稍異耳。邑人以龍目之。天旱輒往禱雨。殊敬視。

### 浮遠堂

浮遠堂舊在江陰君山上。取蘇軾江遠欲浮天之句以名堂。北臨大江。南望城市。一郡之勝概也。

### 薛畏齋墓

薛畏齋墓在江陰縣南鄉塘下橋北畏齋明江西按察使副使墓前有石人石馬之類。去墓西半里許曰西莊。有畏齋祠。懸有海瑞書贈抗節崢嶸四字扁額。

### 狼山寺

狼山寺在南通縣狼山上。寺有額曰第一山。有聯曰「長嘯一聲。山鳴谷應。舉首四顧。海闊天空。」寺後有支雲塔。殿壁有古人石刻。

### 曹頂墓

曹頂墓亦在狼山上。墓有碑曰明忠節曹頂之墓。墓後爲祠。相近又有倭子墳。高如小阜。傳係倭人被俘而死者。

## 四 淮揚

### 仙人洞

仙人洞在淮陰縣西南老子山西。深可二丈許。下臨淮水。四壁如削。形勢頗

爲幽險。

韓信城

韓信城舊在淮陰縣西。馬頭鎮相近。城之西北隅曰韓王莊。卽漢韓信故里。

漂母冢

漂母冢在淮陰縣西南泰山墩。相對有一陵。相傳爲韓信母冢。俗因呼爲東西冢。

枚乘故里

枚乘故里在淮陰縣東南。舊有枚乘亭。乘字叔。爲吳王濞郎中。王初謀爲逆。乘上書諫。不納。去之。從梁孝王游。王尊爲上客。善屬文。嘗作七發。進楚太子。詞賦尤高。爲一代作手。漢武即位。以安車蒲輪徵之。道卒。子皋。字少孺。武帝時上書北闕。拜爲郎。亦善詞賦。且敏捷。揚雄曰。軍旅之際。戎馬之間。飛書馳檄。則用枚皋。

## 韓信釣臺

韓信釣臺在淮安縣北。韓信嘗釣於此。清崑山徐昂發詩云：「木落荒原水氣昏。英雄漁釣跡猶存。蒯通不售三分策。漂母長留一飯恩。人歎老臣知國士。天哀女子殺王孫。藏弓烹狗由來事。只合終身淮上村。」

## 漂母祠

漂母祠在淮安縣望雲門外。明黃省曾嘗謁祠。有文云：「予自北歸。艤舟淮陰。乃登觀散趾。謁漂母於城。因歎韓信之在當時。三老無所舉。縣次不以擇。胸函冠代之略。才蘊帝師之算。不能博一餐於鄉人。蓐炊絕往。川釣無獲。綠草曷茹。清波難飽。使無漂母之飯。則楚溝之季。信恐不免矣。宜其一旦致侯王。聲天下。而奉千金以爲報也。且夫常人之情。嚮輒於顯宦之門。雖萬鎰之輸。不以爲吝。昭華夜光之珍。每百方求進。以一受爲榮。至於茅素埃塵之士。神龍不雲。黃鶴無羽。所須者斗釜之粟耳。孰肯誤有毫毛之捐。以濟其旦夕。」

之命哉。此母之高義。所以爲難。而千金之報。予猶以爲薄也。或曰。廟貌之享。不爲過歟。予曰。天將降大任於是人也。必先投之窮辛抑鬱之地。無所往而有適。以堅閱其所具。則是信之貧窶。乃天之所養。以爲英雄者也。母於天之所養。哀而食之數十日。則天心寧有不悅。而使之俎豆於百世乎。信而飢死。則暴項不滅。而蒼生糜爛無已。則是凡信之功。皆母成之也。信既有祠。而母可小哉。當母之時。所謂黃金北斗者。徒皆卉蟻而死。惟母之聲名。齊日月於穹壤。施義之報。宜其然也。嗚呼。今之淮陰。猶夫昔也。莽澤困悴。豈無英雄如信者乎。未問有若漂母以飯之者。於是益知母之高義爲難也。因奠之椒醕。再拜勒文於祠上。

康山

康山在江都縣東南隅。相傳濬河時。積土所成。其上舊有堂。董其昌題曰康山草堂。即康海與客燕飲彈琵琶處。清乾隆時高宗南巡。嘗幸之。御書康山



草堂額。

瓜洲渡

瓜洲渡在江都縣南四十里。與鎮江相對。元和郡縣志云。瓜洲蓋揚子江中之沙磧也。沙漸漲出。狀如瓜字。明吳浩詩云。「淮煙漠漠夕陽收。楚雨昏昏翳客舟。風度鐘聲來北固。帆將燈影過揚州。雲消碧海天無際。波撼金山地欲浮。獨恨壯遊非昔日。滿江風露夜如秋。」

邵伯湖

邵伯湖在江都縣北四十五里。運河之西。東接艾陵湖。西接白茆湖。西南通新城湖。北通高郵。巒社湖。旁有邵伯埭。晉太元十一年。謝安築新城。於城北二十里。築堰以灌民田。民思其德。比於邵公。因名。全湖波流浩瀚。饒有風景。清彭羨門過邵伯湖詩云。「斜暉低驛路。馬首悵何依。晚渡潮爭上。寒塘人獨歸。溪魚時自擲。水鳥慣卑飛。願逐垂綸客。長歌入釣磯。」

### 古井

古井在江都縣舊城小東門內甘泉街南太平地巷。西本明初常遇春駐軍之所。礮兵遺蹟。至今猶存。近歸江都貧兒院。以平築菜圃。井始發現。井式甚古。水則清冽可飲。並於井中得古餅十數。今陳列院中。此井鑿於何代。已難查攷。大抵當在三百年前耳。

### 吳公臺

吳公臺在江都縣西北。一名雞臺。宋沈慶之攻竟陵王誕所築弩臺也。後陳將吳明徹增築之。因號吳公臺。唐高祖武德元年。江都守陳稜葬煬帝於江都宮西吳公臺下。卽此。

### 明月樓

明月樓舊在江都縣治東北。揚州趙氏建。一時題咏甚多。趙氏性好客。趙子昂題楣帖云。「春風闔苑三千客。明月揚州第一樓。」趙氏撤酒器爲贈。專

爲韻事。

### 石塔寺

石塔寺在江都縣甘泉山。本慧照寺。劉宋文帝元嘉十七年爲高公寺。唐睿宗光天二年爲安國寺。肅宗乾元中爲木蘭院。文宗開成三年建石塔。葬古佛舍利。因改名。亦名甘泉寺。撫言王播少孤貧。客揚州慧照寺。隨僧齋餐。僧厭怠。乃齋罷而後擊鐘。播作詩有「慚愧闍黎飯後鐘」之句。宋蘇軾嘗以此事作詩云。「飢眼眩東西。詩腸忘早晏。雖是燈是火。不悟鐘非飯。山僧異漂母。但可供一莞。何爲二十年。記憶作此訕。齋廚養若人。無益祇貽患。乃知飯後鐘。闍黎蓋具眼。」此詩之前有序曰。世傳王播飯後鐘詩。蓋揚州石塔寺事也。相傳如此。戲作此詩云云。

### 文峯塔

文峯塔在江都南門外。近方爲雨山法正寂山等二十餘寺。合力修繕竣工。

崇閔壯麗。極堪遊覽。

梅花嶺

梅花嶺在江都縣廣儲門外。明萬曆中州守吳秀濬河積土而成。因樹以梅。故名。嶺有史閣部衣冠冢。清彭定求嘗過而作詩哀之云。「極目層城古戰場。忠魂飄蕩恨茫茫。軍中空道臨裴度。都下無由仗李綱。碧血久從衰草沒。白雲遙帶古梅香。吾來暗灑三升淚。髣髴靈旗下大荒。」按史閣部諱可法。字憲之。明祥符人。福王立。以兵部尙書大學士督師揚州。拒清兵。城陷被殺。揚人嘗立廟祀之。今廟天寧門外。中多聯語。有「萬點梅花盡是孤臣血淚。一坏故土。還留勝國衣冠。」「殘局泣孤臣。讀奏草終篇。尤見行間含血淚。溯原同一派。幸梅花無恙。又從亂後拜忠靈」等作。

浮香亭

浮香亭舊在泰縣藕花洲後。宋時有御書額。州守陳垓嘗刻秦觀蘇軾蘇轍

僧參寥古梅唱和詩於石。

### 神居山

神居山在高郵縣西六十里。秦觀曰：山不甚廣，而股趾盤礴甚大，傍占數墟，遂爲州境之望。山有煉丹井，井大可五尺，深倍之。一名石塘，又有排牙石，人記其數，輒忘。宋志云：南齊亘公嘗結庵於此，煉丹仙去。

### 巒社湖

巒社湖在高郵縣西北。元至元十三年，張士誠作亂，李齊出守巒社湖，即此。宋孫覺於湖上夜讀書，見大珠光燭天，故黃庭堅詩：「巒社湖中有明月，淮南草木借光輝」之句。舊傳珠現則有休咎之應。

### 霧筋祠

霧筋祠在高郵縣南三十里。相傳唐時女子霧處於野，義不宿於田家，爲蚊所嚼，霧筋而死於此。因立祠祀之。宋紹聖元年，米芾刻石記其事。清康熙四

十六年。聖祖南巡。頒節媛芳躅四字額。乾隆時高宗南巡。亦作霧筋祠詩。立祠以來。上自帝王卿相。下至布衣縑流。莫不各有題詠。可謂盛矣。但據清徐昂發畏壘筆記云。五代時將路金。有德於茲土。民特立廟祀之。霧筋實路金之誤耳。

## 五 徐海

### 寒山

寒山在銅山縣東南十八里。晉書劉遐傳。建武初。沛人周撫以彭城叛。降石勒。遐討撫。戰於寒山。撫敗走。南史梁武帝紀。太清元年。東魏將慕容紹宗大敗蕭淵明於寒山。皆即此。

### 峒山

峒山在銅山縣茅邨相近。上有蘭岩。下有古洞。前有石室。洞幽深不可測。游者雖多。鮮有入穴一窮其底蘊者。

## 漢高祖試劍石

漢高祖試劍石在銅山縣東南漢高祖廟石高三丈餘中裂如破竹不盡者寸相傳此漢高祖試劍石也宋蘇轍嘗觀此石爲作銘

## 荆山口石橋

荆山口石橋在銅山縣東北二十里舊長三百六十丈清乾隆十二年重修長四百八十丈實邑之大建築也

## 快哉亭

快哉亭在銅山縣東南隅水繞如帶細柳拂簷亭外有荷池及至夏時芙蕖灼灼風景尤爲清勝

## 曹操繫馬處

銅山縣利國驛東南奉聖寺前有銀杏樹一株舊傳曹操嘗繫馬於此

## 范增墓

范增墓在銅山縣南雲龍山北。元天曆初，有盜識墓中寶氣，發得古銅劍一口。虞集諸人題詠之。明嘉靖中，戶部主事岳東升表其墓。今巍然高數丈，周數十丈。

### 王陵母墓

王陵母墓在銅山縣西南。有石垣及坊。按當楚漢交爭之際，沛人王陵以衆屬漢。項羽收其母置軍中，欲以招陵。陵使至，其母私送使者，泣曰：爲老妾語陵，謹事漢王。漢王長者，終得天下，無以老妾故恃二心。妾以死送使者，遂伏劍而死。後葬於此。

### 霧豬山

霧豬山在蕭縣東五十里。有霧豬泉，淵匯數畝。東南流至桃山。宋蘇軾祈雨詩有「豈知泉下有豬龍，臥枕雷車踏陰軸」之句。

### 丁公追漢祖處



蕭縣南十五里有丁公山。相傳項羽將丁公。嘗追逐漢高祖。高祖顧曰。兩賢豈相厄哉。丁公罷還。卽此處。

### 聚仙山

聚仙山在蕭縣西北二里。亦名聖泉山。上有泉。雖一勺而挹之不窮。山西有桃花洞。山北有書聲洞。下有拱翠壁。登山游覽。風物清幽。

### 龍岡山

龍岡山在蕭縣東南三十八里。綿亙數里。山南深谷中。有果老洞。又南二里曰龍駒嘴。衆山環繞。中關一路。過數嶺。有雙龍泉。止隔片石。左甘右苦。判然有別。

### 天門寺

天門寺在蕭縣東南三十五里山谷中。三面山厓。峻聳壁立。惟西面闕然如門。稱爲天門。因以名寺。元至正中建。寺外松檀古木甚多。森然圍列。陰翳蔽

日人處其間。如在塵外。

### 小華山

小華山一名東華山。在豐縣東南三十里。周十數里。山有三峰。山巔石皆方平。稍西削壁千仞。又西有華陽洞。深杳莫測。不知所窮。洞西有石室。可坐數人。中峯突起。有自然石級。可以登躡。亦名嵐山。山陽又有洞五。曰會景。曰虛白。曰碧寒。曰太元。曰太乙。皆極幽勝。足堪遊觀。

### 呂布射戟處

後漢袁術遣將攻劉備。備求救於呂布。布植戟營門。射戟中小支。罷兵不戰。今沛縣南門內西隅有戟臺。相傳卽布射戟處。

### 司吾山

司吾山在宿遷北七十里。高百丈。周十五里。漢置司吾縣。以此山名。一名司鎮山。俗名峒嶧山。山有石洞。洞口鑿石爲螭。有水自螭口噴出。宋紹興末。首

領張榮嘗屯兵此山。以拒金人。

中華名勝古蹟 第八編 江蘇

---

中華名勝古蹟終

# 中華名勝古蹟續編目錄

## 第九編 安徽

### 一 安慶……………一一—二二

百子山 菱湖 古樓 迎江寺 鐵牛 余闕墓 碧峯山 白雲岩山 華厓山  
左光斗墓 白厓山 鑿山 西源山 南臺山 司空山 香茗山 三祖山  
白水源 白鶴道人鶴止處 麴信陵墓 王喬山 大蜀山 冶父山 毛公山  
春秋山 五畝尖山 蕊珠宮 陋室 平疴湯 褒禪山 龍洞山 彭祖石室  
昭關 英布墓 挂龍尖山

### 二 蕪湖……………一三—二二

浮邱山 三山 凌家山 博望山 李白墓 尖山 荆山洞 城陽山 黃山  
棧閣 萬安山 千秋潭 落星潭 石老山 壘嶧山 率山 祁山 龍鬚山

大癸山 石照山 祥雲洞 蒼龍洞 陵陽山 華陽山 梅堯臣墓 奎潭 黃  
蛻山 寶峯山 硃砂山 水西山 岩礮洞 桃花潭 古塘山 石鏡山 文脊  
山 石橋山 齊山 桃花鵑 邏人石 江祖石 雨臺山 卸甲嶺 太白岩  
舒姑泉 梅山 印石 句雲洞

三 淮泗

三二—四六

彭祖廟 禹廟 觀魚臺 逍遙臺 皇覺寺 明英陵 十四王妃墓 湯和墓  
橫澗山 三峯山 判虎臺 銅鐘 董槐墓 沐英墓 大澤鄉 扶疏亭 相讓  
臺 玻璃泉 支祈井 豐山 豐樂亭 瑯琊寺 庶子泉 紫微泉 六一泉  
西澗 石樓竄 仙人洞 吉祥庵 孔雀寺 琉璃井

# 中華名勝古蹟續編

## 第九編 安徽

### 一 安慶

#### 百子山

百子山在懷寧縣西北二十五里。濱石湖。羣峯層疊。最高者曰雲峯。山口曰獅巖。奇石稜峭。下臨溪水。居人執梅其上。曰梅谿。山內廣袤可二三里。土性宜桃。春日爛漫如霞。有高嶺曰金坑。爲出山之口。

#### 菱湖

菱湖在懷寧北門外三里許。近由邑人創置公園於此。栽樹蒔花。築臺疊石。布置頗佳。湖中備有遊艇。供人蕩槳。並於城垣東北角。開一新門。建築馬路。以便游人直達其地。爲安慶最新勝境。

### 古樓

古樓在懷寧城內舊藩署前。登臨其上。憑闌遠眺。全城在目。相傳爲周瑜將臺。南面有青天白日四大字石刻。

### 迎江寺

迎江寺在懷寧東門外。層樓聳峙。近接江濱。憑闌遠眺。風景萬千。前清官使往來。於此接送。故一名接官廳。寺有浮屠。清光緒時重修。七級。可登。後有昭忠祠。左爲英果敏公祠。其東爲先農壇。自此沿江而行。有一家。乃殉難之典史墓也。有石碑在。

### 鐵牛

鐵牛在懷寧城。志云。江濬多水怪。初建城時。冶鐵鑄之。一在集賢門內。一在盛唐門內。一在山川壇東。一在天柱閣右。俱藏土中。微露牛脊。寰宇記。北齊皇建（孝昭帝）二年。刺史王洪遺掘鐵牛。遂輦入城。未鎔鑄。于時城中人



馬多疫。問巫覡曰：鐵精爲祟。遂使人送牛本處當埋之時。土沒牛六寸。

### 余闕墓

余闕墓在懷寧西門外二里。墓側有樓曰大觀。有名人楹聯。志云：元末余闕死節。賊義之。求其屍。清水塘中。具衣冠葬此。洪武八年封土繚垣。樹碣墓道以表之。有李宗可墓在余墓左。馬倅墓在余墓右。皆與闕同時死者。

### 碧峯山

碧峯山在桐城縣西北七里。諸山分峙。一澗迤邐。沿澗而入。南崖壁立。下開四洞。可容千人。有披雲洞。尤爲幽勝。

### 白雲岩山

白雲岩山在桐城縣東一百二十里。有東西兩岩。峯有四。曰鐵障、鐵船、絳霄、雙峯。岩之小者有五。曰燕子、蛾眉、雪浪、樓子、墓岩。洞有三。曰函雲、四顧、抱龍。有泉有池。多奇石。其名勝亞於浮山。

### 華厓山

華厓山在桐城縣北八里。高聳橫峙。多石。草木繁茂。中有龍井。又二里。曰石門山。有石如門。一名石門冲。有瀑布懸垂。

### 左光斗墓

左光斗墓在桐城縣北四十里白沙嶺。光斗字共之。明桐城人。萬曆進士。擢御史。光宗崩。李選侍據乾清宮。欲專大柄。光斗上疏極言。選侍遂移宮。熹宗立。晉僉都御史。與楊漣正色立朝。中外倚重。漣劾魏忠賢二十四罪。光斗疏欲繼上。忠賢誦知。與漣俱削籍被逮。下獄。酷訊。與漣同日爲獄卒所斃。崇禎初。贈都御史。諡忠毅。

### 白厓山

白厓山在宿松縣北五十里。陡峭幽奇。與太湖英霍諸山相接。由止鳳河入十餘里。至山麓。緣磴而上。有靈湫飛瀑。明史可法依巉岩結堡。有東峰西峰。

北嶺遂各以其方爲營。間列市肆。惟中峯最爲峻險。相近爲洞坑山。山高而銳。亦有靈湫。

### 鑿山

鑿山在宿松縣東十五里。周三十里。中有仙洞。洞口石磴陡隘。入後豁敞。可容千餘人。底有大河。竅通江海。

### 西源山

西源山在宿松縣西北五十里。水織如環。入山祇河一道。過徑三十六渡。有九井三龍王祠。山後有石扶梯。望周四遠。下爲銅鼓岩。泉滴岩中。如金奏響。相近曰獨山。孤尖迥秀。產茶多竹木。明史可法嘗置天城僅于此。

### 南臺山

南臺山在宿松縣南三里。舊有對酌亭。乃唐李白舉杯邀月處。又南一里曰長安山。下有清官潭。官清則潭水清。否則污濁。甚驗。潭側爲桃花岩。岩左半

里。有嶺曰餞客嶺。

### 司空山

司空山在太湖縣北。相傳爲釋氏二祖傳衣三祖之地。山極高峻。周四十里。山半有洗馬池。雷洞。幽冥深邃。山上平坦。可數畝地。謂之司空原。唐李白嘗避地於此。詩云。「卜居司空原。北將天柱隣。」卽此。元薩天錫遊此山。愛之。嘗結廬居焉。

### 香茗山

香茗山在太湖縣南四十里。望江縣西北七十里。中一峯曰蓮花峯。左曰小茗山。右曰大茗山。尤爲高峻。上有丹砂。山半有洞。可容百人。有泉甘冽可飲。志云。大茗山嶺有巨石屹立。頂平如砥。雲常覆之。有水沿流入馬頭河。五代羅隱偶遊至皖。愛小茗山蓮花峯。築室隱焉。興至則泛小舟載酒肴。酣飲終日而後返。

### 三祖山

三祖山在潛山縣西北二十里。梁高僧隱居處。山有唐僧三祖禪師塔。峭壁間刻有唐杜牧金陵懷古詩。

### 白水源

白水源在潛山縣北二十五里。俗名白水灣。衆山圍繞。西南飛瀑懸垂。宛如白練。景物絕佳。

### 白鶴道人鶴止處

潛山縣北二十里有真源萬壽宮。乃梁白鶴道人鶴止之所。初白鶴道人愛舒州潛山奇絕。僧寶誌亦欲之。武帝命二人各以物識其地。得者居之。道人以鶴止處爲記。寶誌以卓錫處爲記。已而鶴先飛去。忽聞空中飛錫聲。遂卓於山麓。而鶴止他所。卽此處是也。宮中舊有鶴鳴泉。四時不竭。又有應夢井。唐玄宗嘗夢遊於此。因賜名焉。

### 魏信陵墓

魏信陵墓在望江縣治北。信陵唐吳縣人。貞元初爲望江令。有仁政。及代。民遮道留。得再任。卒於官。因葬此。白居易作秦中吟哀之。

### 王喬山

王喬山在合肥縣東一百二十里。接巢縣。含山界。周百餘里。其峯三百又六十道。書以爲第十八福地。屬巢縣者曰紫微山。有王仙君洞。昔王子喬。洪崖先生。並於此得道。晉初會稽道人游先生。撥開洞門。亦得仙去。洞東北有大力泉。水味爲境第一。山本名翠微山。游先生時有紫雲在其上。故名。稍東爲金庭山。上有金庭洞。外有曲水。曰杏花泉。

### 大蜀山

大蜀山在合肥縣西二十里。爾雅釋山。蜀者獨也。屹然孤峙。遠見二百里。一郡之鎮。舊上有開福寺。唐貞觀中慧滿禪師道場。相傳慧滿嘗於寺誦法華。

經。一日有白衣者。稱東海王少子來聽。時苦旱。慧滿令其降雨。答曰。盜布天澤。當殛死。慧滿曰。汝捨身救民。我誦經度汝。白衣者去。大雨隨至。越二日。有龍死於此。取而葬之。民爲立祠。而慧滿誦經益力。

### 冶父山

冶父山在廬江縣東北二十里。峯岩峻峭。林巒森密。盤互數十里。自麓至巔。計五里餘。上有龍湫。亦曰鑄劍池。又有百丈伏虎。白佛三巖。諸葛白兔二嶺。凡有三百六十四子山。羅列其下。清冽之泉甚夥。峯林泉壑。均饒佳妙。爲縣名山。

### 毛公山

毛公山在廬江縣東北七十里。與巢縣接界。相傳漢毛義隱此。上有毛公洞。爲毛義讀書處。明嘉靖中。嘗建毛公書院於此。又北半里爲蓮花洞。石蓮下垂。巧侔雕琢。至堪觀賞。

### 春秋山

春秋山在舒城縣南二十五里。其上爲宋李公麟讀書堂。有洗硯池。望湖尖。鳳凰臺。仙人峯。絕頂有洞。可容數千人。

### 五畝尖山

五畝尖山在無爲縣北五十里。頂平五畝許。面臨巢湖。羣山背峙。登巖望之。萬頃皆碧。回顧則崇峯疊嶂。隱見爭奇。乃州中極高處。抑亦登眺勝地也。

### 蕊珠宮

蕊珠宮在無爲縣北巢縣南。舊名崔仙洞。唐崔自然所居。後易名蕊珠。有石牀。石梁。藥臼等遺跡。按崔自然巢縣人。少好道。得服松脂法。隱洞中。避穀。修煉。相傳冬雪積滿溪中。竟能澡浴。每入山。虎豹皆馴服。一日告逝。後有人見之。豫章道上。

### 陋室



陋室在和縣治。唐劉禹錫知和州時築。有文曰。山不在高。有仙則名。水不在深。有龍則靈。斯是陋室。惟吾德馨。苔痕上階綠。草色入簾青。談笑有鴻儒。往來無白丁。可以調素琴。閱金經。無絲竹之亂耳。無案牘之勞形。南陽諸葛廬。西蜀子雲亭。孔子云。何陋之有。

### 平疴湯

平疴湯在和縣北三十里。一名香淋泉。又名平疴泉。水溫潔。有患疥瘡者。浴之輒愈。舊有石碑。宋治平中名其地曰平疴鎮。

### 褻禪山

褻禪山在含山縣北十五里。王安石褻禪山記。褻禪山亦謂之華山。唐浮圖慧褻始舍於其址。而卒葬之。以故其後名之曰褻禪。有起雲峯。龍洞。龍女泉。白龜泉諸勝。相近有華陽山。一名蘭陵山。山前後有二洞。巔又有天梯洞。

### 龍洞山

龍洞山在和縣西南四十里。有石洞。中深杳邃。泉流不竭。下流爲魯橋澗。宋秦觀云。龍洞山形陡起。其上巖崿。不可窮竟。門則大穴也。漸下十數丈。窅然深黑。揭炬然後可入。腹中空豁。可儲粟數萬斛。屏以青壁。而泉啣其趾。

### 彭祖石室

含山縣西南六十里有白石山。周七十里。道家以爲第二十一洞天。名瓊秀長貞之天。白石水發源於此。山下有洞。洞口初俯。僂而入。約數十步。乃漸高。廣莫知遠近。有二石龍。鱗甲皆成。卽彭祖所居石室也。

### 昭關

昭關在含山縣北。昭關山小峴山西。史記范雎傳。伍子胥橐載而出昭關。宋史王德傳。紹興十一年。德夜拔和州。敵退保昭關。又擊敗之。卽此。又宋紹興中。張浚嘗因山築城。置水櫃以遏金兵。

### 英布墓

英布墓在英山縣東英山尖下。石碑尙存。布臯陶後漢六安人。少時有客相之曰。當刑而王。及壯坐黥。因改姓黥。秦末以兵屬項梁。項羽封爲九江王。後因酈食其之說。歸漢。佐高祖定天下。封淮南王。後以韓信彭越見誅。懼禍及己。發兵拒命。高祖討平之。

### 挂龍尖山

挂龍尖山在霍山縣西五十里。山有龍泉瀑布。遙望如白龍懸挂。歎珠濺玉。景物頗佳。

## 一 燕湖

### 浮邱山

浮邱山在繁昌縣東十五里。亦名隱玉山。周四十里。產茶甚佳。有二峯。第二峯有石壇。仙洞。丹井。龍池。諸勝。至堪游觀。

## 三山

三山在繁昌縣東北三十五里。三峯秀起。曰老子。方文。秦望。上有九蓮洞。山東即三山磯。宋陳堯佐舟泊磯下。見江神。告以明日當避風。卽此。

### 凌家山

凌家山在當塗縣東三里。明萬曆末造凌雲塔於其上。因稱凌雲山。南瀕姑溪。有巨石屹立。名釣魚臺。相傳李之儀垂釣於此。山西有石洞。幽深窈曲。莫窮其境。稍東爲月盤山。一名雷峯。下有全真岩。

### 博望山

博望山在當塗縣西南三十里。亦曰東梁山。與對岸之西梁山相對。相望如門。因曰天門山。或曰宋孝武閱水師。有雙雀集繖。蓋立雙闕於山。因曰天門山。吳魏宋皆置戍於此。前清建有礮臺。派兵駐守。蓋自古爲長江關要地也。

### 李白墓

李白墓在當塗縣東南青山之北。白肅宗寶應元年卒。初葬采石。後遷龍山。

憲宗元和十二年觀察使范傳正祭白冢禁樵采訪後裔得其二孫女進見因泣曰。先祖志在青山。頃葬東麓。非本意。傳正乃委當塗令諸葛縱改葬於此。去舊塋六里。今有祠在山麓。又有一祠在采石山。明萬曆初御史蔡夢說建。清屈大均采石題李白祠詩云。「才人自古蛟龍得。太白三閩兩水仙。辭賦已同雙日月。精靈還作一山川。江間絕壁丹青出。木末飛樓俎豆懸。千載人稱詩聖好。風流長在少陵前。」（自注。朱紫陽嘗謂太白聖於詩。祠上有亭。當翠螺山頂。予因題曰詩聖亭。）「英雄有命在文章。豈惜飄零蜀道長。談笑不須同太傅。功名自可與汾陽。青蓮一去無仙客。金粟重來只醉鄉。白玉盤中雙照影。輸君華髮似秋霜。」「牛渚西江月色新。清光長見謫仙人。詩多諷諫因天寶。道在佯狂得季真。金鉉已銷飛燕口。錦袍空映鳳凰身。垂輝不用多刪述。天與英雄只老春。」「樂府篇篇是楚辭。湘纍之後汝爲師。烏栖豈寫亡吳怨。猿嘯唯傳幸蜀悲。烟水蒼茫投賦地。霜林寂歷禮魂時。重

華一別無消息。終古龍魚恨在茲。」

### 尖山

尖山在廣德縣南七十五里。衆山環繞。一峯高秀如筆。最稱清勝。山皆巉岩怪石。石上有水一泓。初無泉脈。旱不涸。雨不溢。山下多飛泉。景物最佳。

### 荆山洞

荆山洞在廣德縣北六十里。一名長樂洞。亦曰馮家洞。洞口如厦屋。四五間。可容千人。一徑斜入。有石燕羣飛。乳泉滴漑。神人佛像。碁盤鐘磬之屬。皆白石天成。岸下有潭。深不可測。相傳與太湖通云。

### 城陽山

城陽山在歙縣南二里。環迴孔高。爲城郭之襟帶。居郡之南。故號城陽。爲邑人許宣平得道之所。李白見其題壁詩。訪之不獲。卽此。今山有穿雲亭、禮斗壇、仙母谷、丹地、俗仙池諸勝。

## 黃山

黃山在歙縣西北。與太平縣接界。原名北黟山。唐天寶六年改今名。世傳黃帝嘗與容成子浮邱公合丹於此。其後又有仙人曹阮之屬栖焉。山有峯三十六。水源亦三十六。溪二十四。洞十二。岩八。海五。峯之最高者曰天都峯。雄秀峻峭。聳峙雲中。水曰香水溪。峯下兩厓間曰天門坎。次曰蓮花峯。水曰蓮花源。洞曰蓮花洞。峯頂有香砂池。下有蓮花溝。峭壁曰大小闔王壁。狀其峻險也。峯旁有蓮蕊峯。頂有石如船。曰采蓮船。北又爲鰲魚峯。有鰲魚洞。西北爲九龍峯。次曰疊障峯。巖曰石乳岩。水曰白雲溪。匯爲白龍潭。又流爲硃砂溪。次曰硃砂峯。水曰香林源。下有硃砂庵。亦曰慈光寺。明萬曆時建。中有木蓮。花如蓮而九瓣。果能愈氣鬱。自慈光寺經天門坎。可至文殊院。途間怪石磊砢。形狀萬殊。歷雲巢洞。臥龍洞。度仙橋。文殊洞。一線天。諸勝而達院前。有松曰迎客。臺曰文殊。登臨放眼。乃觀雲海最佳處也。山志云。山時有鋪海之

奇。白雲四合。彌望如海。形態萬千。忽迸散。山高出雲外。天宇曠然。即此。然以八九月爲最佳。院側遙望一峯曰耕雲。頂有石如鼠。作跳躍狀。曰仙鼠跳天。次曰紫雲峯。水曰榆花溪。峯下有溫泉。深三尺。廣七八尺。長丈四尺。又有紫雲庵。額曰黃山第一茅篷。凡自歙往遊黃山者。由東南湯口以進。必經此。可以餐宿。庵臨青龍潭。潭之上流。即白龍潭。庵後有二瀑布。來自天都。長數百尺。蜿蜒而下。望如白練。次曰獅子峯。狀肖狻猊。前有石如球。球有亡剝曰獅子林。林前有松。鵠萬松。森立。陰翳蔽日。有奇松曰破石。一品。連理等。林後有望仙臺。遊黃山者。自太平而往。由北海門入。可於此餐宿。次曰鉢盂峯。水曰丞相源。有洞曰仙僧。舊時遇陰夕。洞內發光如星。名曰聖燈。峯之前有擲鉢禪院。亦曰雲谷寺。距獅子林二十里。遊黃山者。東從苦竹溪進。往往餐宿於寺。寺旁有蘿松。次曰浮邱峯。水曰浮邱溪。次曰容成峯。有丹井。丹爐遺跡。水曰容溪。次曰軒轅峯。上有軒轅石像。洞曰仙人。水曰紫雲溪。次曰煉丹峯。下



有丹泉煉母臺。水曰洗藥溪。次曰紫石峯。水曰滑泉源。次曰青鸞峯。水曰采藥源。次曰桃花峯。水曰桃花溪。次曰石人峯。有駕鶴洞。水曰白鹿源。次曰雲際峯。有藏雲洞。水曰乳水源。次曰上昇峯。有阮公岩。水曰阮公溪。次曰清潭峯。水曰錦魚溪。次曰翠微峯。有洞。水曰青牛溪。次曰仙都峯。水曰仙都源。次曰望仙峯。水曰絃歌溪。次曰九龍峯。有岩。有洞。水曰九龍溪。次曰聖泉峯。上有湯池。其水入甘泉溪。次曰石門峯。水曰石門溪。次曰石柱峯。水曰石壁源。次曰雲門峯。水曰雲門溪。次曰布水峯。水曰紅泉溪。次曰石牀峯。水曰石室源。次曰丹霞峯。水曰丹霞溪。次曰雲外峯。水曰紅杏源。次曰松林峯。水曰松林溪。次曰芙蓉峯。隔溪有馬跡石。次曰采石峯。水曰白龍源。次曰仙人峯。有洞曰仙人。又次曰飛龍峯。基石峯。除此三十六峯之外。曰始信峯。有石梁曰脫凡橋。梁首一松。曰接引松。峯頂有江麗田琴臺。風景絕佳。峯下爲散花隴。中有擾龍松。聳然挺秀。黃山號稱三十六峯。顧此指卓卓大者耳。若其他小

峯細巒。殆難屈數。而泉澗之屬。亦隨處有之。然最奇者。惟西北部之九龍瀑。九龍瀑者。水由高厓而下。陷而為潭。潭流而為澗。澗復降而為瀑。如是大小凡九疊。每疊數十尺。終乃注於丞相源。他山之瀑。類多直下少曲致。此獨驚川聒谷。濺至跳珠。屈折變化。演成巨觀。正如世之高人畸士。岸然自異。不與流俗同。庸非奇哉。黃山高度。至今鮮正確之測計。第居于上。溫度迥異尋常。則高寒可知。故遊山者。宜多帶衣服。且雲峯層出。歧路紛紜。尤宜人攜磁鍼。隨時定向。庶免迷途之虞焉。

棧閣

黟縣東南三十里。有石門山。鑿石為門。下瞰溪潭。壁立千仞。沿岩鑿路。僅可通步。斷處以木濟之。名曰棧閣。勢絕峻險。

萬安山

萬安山在休寧縣東七里。舊名萬歲山。宣和中改為萬安。今亦曰古城。岩下

有巨石高丈餘。宋知縣事鄒補之。隸書兌卦作磨厓碑。爲縣東鎮。

### 千秋潭

千秋潭在休寧縣東十七里。廣十丈餘。深不可測。每天旱禱之。往往得雨。潭之東曰仙掌。上有古松五株。

### 落星臺

落星臺在休寧縣西南三里。懸厓絕壁。巨石墜下如臺狀。宋治平中。知縣事呂大防書斷石二字於上。

### 石老山

石老山在婺源縣西六十里。三峯聳秀。頂上平廣數百畝。中有龍潭。其東爲古城山。亦名獅成山。其形如城。外峻中平。口僅丈許。宋岳武穆嘗駐軍於中。

### 嚙嵒山

嚙嵒山在婺源縣西南一百里。周數十里。漕溪水出此。宋張敦頤許月卿元

程文相繼續讀書於此。附近有仙女巖。峯最翠嶺。有金鏡岩。水清皎若鏡。

### 率山

率山在婺源縣西北一百二十里。一名天障山。亦名張公山。山脈由五嶺而北。重岡複嶺。周百餘里。東北界休寧。西北界祁門。西界江西之浮梁。上有清風嶺。瀑布泉。那伽井。龍井。張公洞。西行二十里。有擂鼓峯。仰天臺諸勝。

### 祁山

祁山在祁門縣東北一里。高四十仞。東十五里。三面石壁。有石室高五丈。闊二十丈。號青蘿巖。旁有湧泉。號乳泉。

### 龍鬚山

龍鬚山在績溪縣東二十里。周三十里。頂有一池。四時不竭。右爲飛龍臺。有石門。天梯。飛泉。瀑布。石鼓。石筍諸迹。皆堪游觀。

### 大槩山

大槩山在績溪縣北六十里。周百里。前踞潭水。蹲形矯首。有犬之象。山半有巖。名仙人巖。中產異菜。俗呼曰劉隱菜。下有洞。曰白龍。

### 石照山

石照山在績溪縣東南二里。有石壁。明瑩鑑人毛髮。石罅中有泉湧出。曰白水泉。多產菖蒲之屬。

### 祥雲洞

祥雲洞在績溪縣西十里。上下二洞。盤曲相通。其上洞奧曠如廈。可坐百人。頂有牖。螺旋而上。又去四十餘里。有聖泉洞。洞右兩山對峙。下臨絕壑。其上有石。相接如橋。

### 蒼龍洞

績溪縣北二十里蒼龍山。有蒼龍洞。瀑布從洞上飛落。大壑上有石城環繞。中匯爲石潭。淵深莫測。

### 陵陽山

陵陽山在宣城縣。郡垣據山之岡麓。有三峯矗立。嶂巒盤曲。爲郡之鎮。漢丹陽竇子明。獲白魚。剖得丹書。論服餌之術。因修道於此山。而仙去。曰陵陽子明山。有黃鶴池。相傳卽子明飛昇處。

### 華陽山

華陽在宣城縣南七十里。跨宣涇寧旌四邑。周數十里。高數百仞。其高峯迺出雲表。山僧依麓構屋。覆以錢瓦。人多雜猿。援以居。山之支隴爲洞山。山有洞。可容數百人。附近爲稽亭山。景極幽曠。有仙人巖。三天洞。諸勝。

### 梅堯臣墓

梅堯臣墓在宣城縣南柏山。堯臣字聖俞。詢從子。以蔭爲河南主簿。仁宗時。召賜進士出身。爲國子監直講。累遷都官員外郎。預修唐書。成未奏。卒。堯臣家貧。喜飲酒。與物無忤。當時賢士大夫多喜與遊。工詩。名重一時。歐陽修與

爲詩友。自以爲不及。所著有孫子注十三篇。唐載記二十卷。毛詩小傳二十卷。宛陵集四十卷。

### 奎潭

奎潭在南陵縣東北六十五里。凡九十九曲。三關三鎖。中有六墩類奎星。故名。饒蓮藕菱芡。水鄉稱陸海焉。

### 黃峴山

黃峴山在涇縣東南六十里。亘十餘里。羣巒疊嶂。雄鎮一方。縣治祖山也。西南有太乙華蓋天乙三峯。下有三池。又有淑花隴。雙石隴。蘚坑。石馬諸勝。

### 寶峯山

寶峯山在涇縣西八十里。石岩高數十尋。有人物鳥獸狀。雕繪不能及。山背一竇甚紆折。出竇又平遠空曠。飛流千尺。鏗訇趾下。境地巧奇。

### 硃砂山

硃砂山在涇縣東南五十里。廣袤二千餘丈。俯瞰長流。巉岩峻險。相對者曰石鼓山。有飛泉迸湍。其聲如鼓。又南爲皇托山。山有陽和洞。洗刀池。相傳晉桓爨磨劍於此。

### 水西山

水西山在涇縣西南五里。林壑邃密。下臨賞溪。循溪而入。有隴曰水西坑。最爲幽勝。相傳唐宣宗嘗遊此。有詩云：「長安若問江南事。報道風光在水西。」後人因爲建風光閣焉。

### 岩籬洞

岩籬洞在涇縣北二十五里。與琴高山隔溪相對。廣袤數丈。高二丈。如螺旋。不柱而屋。洞後有一洞。高丈餘。深數十丈。東西可往來。

### 桃花潭

桃花潭在涇縣西南。唐李白與汪倫萬鉅遊於此。潭上舊有釣隱臺。彩虹岡。



壘玉墩。皆當時遊詠之所。李白詩云：「桃花潭水深千尺。」即此潭也。

### 古塘山

古塘山在旌德縣南十五里。高三十五仞。周十五里。東與績溪縣接界。其西爲黃高峯。兩峯對峙。有登仙橋。硃砂石壁。師子厓。龍棲池。旁有岩洞。溜下成潭。

### 石鏡山

石鏡山在寧國縣西一百十里。有石如鏡。照之形多變異。有龍岩瀑布。

### 文脊山

文脊山在寧國縣西北三十里。一名曷山。西接涇縣旌德諸山。北接宣城柏枧山。峯巒攢秀。岩洞盤旋。爲郡之雄鎮。東南有石壁峭立。劃然中開。儼若城闕。謂之山門。中有山洞五。水洞一。岩石最爲幽勝。

### 石橋山

石橋山在貴池縣南九十里。山之東兩峯對峙。一石橫其上。廣數丈。袤十丈。天然成橋。橋下有泉水奔流入穿山洞而出。

### 齊山

齊山在貴池縣南三里。有峯十餘。其高齊等。故名。周二十里。山有九頂山洞。多亭臺。有大小流泉數十。風景絕佳。唐杜牧之。宋魏了翁等。皆遊憩於此。山西有湖。曰齊山湖。中有小山。曰珠兒山。一名石洲。

### 桃花隴

桃花隴在貴池縣西。唐李白竄夜郎時。有憶秋浦（貴池漢曰石城。隋改秋浦。五代楊吳順義六年改今名）花隴舊遊詩。卽此。同遊者高霽也。石刻大小十六字。今尙存在。高霽隱處在縣南九十里石門山。上有春臺岩。

### 邏人石

貴池縣南二十里有萬羅山。圓峯孤突。羣山羅列。上有石曰邏人石。唐李白

詩云「邏人橫鳥道。江祖出魚梁。」卽此。

### 江祖石

貴池縣西南二十五里。有一石突然出水際。其高數丈。上有仙人蹟。名曰江祖石。其下有江祖潭。

### 雨臺山

雨臺山在石埭縣西十五里。仰對黃山。俯臨清溪。有七十二折。奇峰四列。風物最佳。有石蓮花峯。頂平如掌。

### 卸甲嶺

卸甲嶺在石埭縣西四十里。昔刺史查岳禦黃巢。於此卸甲。有仙人洞。洞口甚小。僅容一人。石壁玲瓏。直通嶺巔。約有里許。

### 太白岩

太白岩在石埭縣西七十里。亦曰龍王洞。中空可容數十人。有石門石臺之

屬。

### 舒姑泉

舒姑泉在石舒縣南。一名舒溪。搜神後記云：臨城縣南四十里有蓋山，百許步有舒姑泉。俗傳有舒氏女，與父析薪於此，女坐泉處，忽牽挽不動。父遽告家，及再至，惟見清泉湛然。其母曰：吾女好音樂，乃作絃歌。泉涌回流，有朱鯉一雙。今人作樂，嬉泉輒涌出。劉孝標曰：蓋山之泉，聞絃歌而赴節。顧野王詩云：「寧知蓋山水，逐節赴危絃。」皆指此。

### 梅山

梅山在秋浦縣西南十里。宋時僧志南居之。朱子訪至山中，與之倡和，爲書普門二字刻於石壁。宋時嘗建四亭，曰期雲，曰漱碧，曰空翠，曰熟梅。

### 印石

秋浦縣西北八里石印山，有石印嶺。嶺下有洞，厓壁有印文。相傳許遜逐蛟

至此。印石而去。此其遺蹟也。下有池曰石印池。

### 白雲洞

白雲洞在青陽縣東二十里。奇峯怪石。莫可名狀。秉燭入遊。竟日莫測其底。

## 三 淮泗

### 彭祖廟

彭祖廟在鳳陽縣東南四十里雲母山。相傳彭祖服雲母石修煉於此。後人因立祠祀之。云蘇軾詩云。「跨歷商周看盛衰。欲將齒髮圍蛇龜。空餐雲母連山盡。不見蟠桃著子時。」

### 禹廟

禹廟在鳳陽懷遠兩縣交界處。殿前有古柏兩株。石蘭迴護。枝幹蒼老。大數十圍。相傳爲禹王手植物。

### 觀魚臺

觀魚臺在鳳陽縣東二十里。亦曰莊周臺。相傳莊子與惠子觀魚之所。宋蘇軾詩云：「欲將同異較錨銖。肝膽猶能楚越如。若信萬殊歸一理。子今知我我知魚。」

### 遙臺道

逍遙臺在鳳陽城內。唐刺史梁延嗣築。置祠刻像於其上。宋蘇軾有逍遙臺詩。自注云：莊子祠堂在開元寺。卽墓爲堂也。詩云：「常怪劉伶死便埋。豈伊忘死末忘骸。烏鳶奪得與螻蟻。誰信先生無此懷。」附近舊有南華堂。明嘉靖時楊榮建。中藏南華經。旣而燬於火。萬曆時知縣賈應龍重建。清康熙時孫儻祖重修。並將樓之形式繪圖刻石。今樓已傾圮。祇存碑石而已。

### 皇覺寺

皇覺寺在鳳陽城北里許。洪武初敕建。改名龍興寺。明太祖微時。嘗爲寺僧。今寺已傾壞。然尙有明太祖像。龍興寺碑。及銅鐘鼓。銅鑊等物在。

## 明英陵

明英陵明太祖父母陵也。亦曰皇陵。在鳳陽城南十八里太平鄉。綱鑑云：太祖之先，故沛人。徙江東句容，爲朱家巷。宋季，大父再徙淮家泗洲。父世珍，又徙鐘離（即鳳陽）太平鄉。母陳，生四子。太祖其季也。太祖少時，常苦病。父欲度爲僧。歲甲申，泗大疫，父母兄及幼弟俱死，貧不能殮，藁葬之。仲與太祖昇至山麓，綆絕，仲還取綆，留太祖守之。忽雷雨大作，太祖避村寺中。比曉，往視，土墳起成高壟，地故屬鄉人劉繼祖，繼祖異之，歸焉。按陵有城三，內曰皇城，周七十餘步，中爲縛城，周六里八十一步，外爲土城，周二十八里。舊有享殿松柏，崇禎八年，張獻忠破鳳陽，盡被焚毀。今惟碑碣石人石馬存耳。石碑甚高大，文係御製，相傳文光由詞臣擬作，都不稱旨，因自撰，文曰：「孝子皇帝元璋謹述。洪武十一年夏四月，命江陰侯吳良督工新建皇堂，予時秉鑑窺形，但見蒼顏皓首，忽思往日之艱辛，况皇陵碑記，皆儒臣粉飾之文，恐不

足爲後世子孫戒。特述艱難。明昌運。俾世代見之。其辭曰。昔我父皇。寓居是方。農業艱辛。朝夕徬徨。俄而天災流行。眷屬罹殃。皇考終於六十有四。妣五十有九而亡。孟兄先死。合家守喪。田主德不我顧。呼叱昂昂。既不與地。鄰里惆悵。忽伊兄之慷慨。惠此黃壤。殯無棺槨。被體惡裳。浮掩三尺。奠何有漿。既葬之後。家道惶惶。仲兄少弱。生計不張。孟孫携幼。東歸故鄉。值天無雨。遺蝗騰翔。里人缺食。草木爲糧。予亦何有心。驚若狂。乃與兄計。爲何是常。兄云。去此。各度凶荒。兄爲我哭。我爲兄傷。皇天白日。泣斷心腸。兄弟異路。哀痛遙蒼。汪氏老母。爲我籌量。遣子相送。備醴馨香。空門禮佛。出入僧房。居未兩月。寺主封倉。衆皆爲計。雲水飄颻。我何作爲。百無所長。依親自辱。仰天茫茫。既不可依。侶影相將。突朝烟而急進。暮投古寺。以趨躋。仰窮厓。崔嵬而倚碧。聽猿啼。夜月而淒涼。魂悠悠而覓父母。無有志落魄而徜徉。西風鶴唳。俄浙瀝以飛霜。身如蓬逐而不止。心滾滾乎湯湯。口浮雲乎三載。年方二十而強。時乃



長淮盜起。民生攘攘。於是思親之心昭著。日遙盼乎家邦。已而既歸。仍復業於口皇。住方三載。而又雄者跳梁。初起汝潁。次及鳳陽之南鄉。未幾陷城。深高城隍。據守不去。號令彰彰。友人寄書云。及去降。既憂且懼。無可籌詳。傍有覺者。將欲聲揚。當此之際。逼迫而無已。試與智者相商。乃告之曰。果束手以待罪。亦奮臂以相戕。智者爲我畫計。且禱神以默相。如其言以往。卜問去守之何祥。神乃陰陰乎有警。其氣郁郁乎洋洋。卜逃卜守。皆不吉。將就凶而不妨。即起趨降。而附賊。幾被無知而創。小頃獲釋。身體安康。從役朝暮。日日戎行。元兵討罪。將士湯湯。一攫不得。再攫再攘。移營易壘。旌旗相望。已而解去。棄戈與鎗。予脫旅隊。馭士控韁。出遊南土。氣舒而光。倡農夫以入伍。事業是匡。不逾月而衆集。赤幟蔽野而盈岡。率渡清流。戍守滁陽。思親詢舊。終日慨慷。知仲姊之已逝。獨存駙馬與甥雙。駙馬引兒來我棲。外甥見舅如見娘。此時孟嫂亦有知。攜兒挈女皆從傍。次兄已沒又數載。獨遺寡婦野持筐。因兵

南北。生計忙忙。一時會聚如再生。牽衣訴昔以難當。於是家有眷屬。外口兵  
鋼。羣雄併驅。飲食不遑。暫戍和州。東渡大江。首撫姑熟。禮儀是尙。遂定建業。  
四守關防。礪兵秣馬。靜看頡頏。羣雄自爲乎。聲教戈矛。天下鏗鏘。元綱不振  
乎。彼世祖之法豪傑。何有乎仁良。予有張皇六師。飛旗角亢。勇者效力。智者  
贊襄。親征荆楚。將平湖湘。三苗盡服。廣海入疆。命大將軍東平乎吳越。齊魯  
耀乎旌幢。西平乎伊洛。崱幽。地險河湟。入胡都而市不易肆。虎臣露鋒刀而  
燦若星鉞。是以長驅乎井陘。河山之內外。民庶咸仰。關中既定。市巷笙簧。元  
菟樂浪以歸。版籍南藩。十有三國而來。王依金陵而定鼎。託虎踞而儀鳳凰。  
天塹星高而月輝。海滄鍾山鎮嶽。而巒接乎銀潢。欲厚陵之微葬。卜者乃曰  
不可而地且臧。於是祀事之禮已定。每精潔乎蒸嘗。唯劬勞罔極之恩難報。  
勒石銘於皇堂。爲世世承運而務德。必彷彿於殷商。淚筆以述難。諭嗣以撫  
昌。稽首再拜。願時時而來饗。洪武十一年歲次戊午七月吉日建。」

## 十四王妃墓

十四王妃墓在鳳陽縣西北二十五里粉團洲。乃明太祖先代之墳塋也。

## 湯和墓

湯和墓在鳳陽縣西北三十里。和字鼎臣。明濠人。從太祖定天下。戰功甚偉。以功封信國公。年七十卒。贈東甌王。諡襄武。配享太廟。列祀功臣廟。位皆第五。

## 橫澗山

橫澗山在定遠縣西北七十四里。上有澗泉。宋史高祖紀。紹興元年。王才遣將丁順園濠州。劉光世遣兵攻橫澗山。順解圍去。又明太祖初起義兵。取橫澗山。遂入滁州。皆卽此。

## 三峯山

三峯山在定遠縣西北三十里。上聳三尖。山半有禪窟洞。石窟泉。修篁古木。

參映前後。爲一邑之勝。山腰有禪窟寺。唐元和間建。舊名虎窟寺。有泉穿屋壁而出。前有紫虎石。旁有茂林修竹。森映寺宇。寺後有洞口。殊窄狹。蛇行可入。中有石床、石燕、石桌之屬。

### 判虎臺

判虎臺在定遠縣治後。有繫虎石。判虎臺石刻並碑記。相傳宋包拯爲令時。有虎傷人。拯移檄於神。虎自赴縣。判虎於此。

### 銅鐘

銅鐘在定遠縣舊署前古樓。寬五六尺。高十餘尺。朝暮有人擊之。每次百零八。下定遠全境百零八保。攷鐘聲亦以此爲率。不得增減。增減之必出事故云。

### 董槐墓

董槐墓在定遠城內西隅。墓前有豐碑。槐字廷植。宋定遠人。登進士淳祐中。

爲給事中。羣臣奏事。少與法違。憚槐不敢上。寶祐初。參知政事。累封許國公。卒諡文清。

### 沐英墓

沐英墓在定遠縣西門外清澄灣。墓前有石獸。分列兩旁。英字文英。明定遠人。初爲太祖養子。積功至大都督同知。以破番寇功。封西平侯。尋從傅友德征雲南。鎮滇中。務開墾。得田百餘萬畝。卒贈黔寧王。諡昭靖。配享太廟。肖像功臣祠。位皆第六。

### 大澤鄉

大澤鄉在宿縣西南。故蘄縣西。史記陳涉世家。行至蘄西大澤鄉。遇雨失期。乃同謀起兵。即此。

### 扶疏亭

扶疏亭在宿縣北城上。宋蘇軾守徐日。嘗遺墨竹於宿州刺史。刺史鑄諸石。

構亭貯之。名曰扶疏亭。經歷代修葺。至今尙存。

### 相讓臺

相讓臺在阜陽縣東二里。楚史拾遺云。楚莊王立層臺於寢邱。諫而死者七十二人。最後納寢人諸御之言。解層臺。罷民役。名其臺曰相讓。

### 玻璃泉

玻璃泉在盱眙縣東第一山下。水自石龍口中噴注池中。泉上有屋。中有石刻甚夥。

### 支祈井

支祈井在盱眙縣東北三十里下龜山。寰宇記。禹治永。三至桐柏山。獲淮澗水。神曰無支祈。鎖之龜山之足。淮水乃安流注海。今井上蓋以巨石。相傳禹鎖無支祈於中。其處有廟。曰無支祈廟。殿前有碑。爲淮瀆碑。

### 豐山

豐山在滁縣西南五里。昔豐沛人常居之。故名。上有漢高祖廟。天欲雨。常有雲氣發山椒。若巾帽然。諺曰：豐山着帽。豐年之兆。山北爲幽谷。地汙下。邃密。四周皆山。昏旭異態。東下百餘步。爲柏子龍坑。一名龍潭。西北頂上有雙燕洞。深四五丈。能出雲雨。

### 豐樂亭

豐樂亭在滁縣西南琅琊山腰。幽泉谷上。宋歐陽修建。自爲記。蘇軾書刻於石。文曰：一修旣治滁之明年夏。始飲滁水而甘。問諸滁人。得於州南百步之近。其上則豐山聳然而特立。下則幽谷窈然而深藏。中有清泉滂然而仰出。俯仰左右。顧而樂之。於是疏泉鑿石。闢地以爲亭。而與滁人往遊其間。滁於五代干戈之際。用武之地也。昔太祖皇帝嘗以周師破李景兵十五萬於清流山下。生擒其將皇甫暉。眺鳳於滁東門之外。遂以平滁。修嘗考其山川。按其圖記。升高以望清流之關。欲求暉風就擒之所。而故老皆無在者。蓋天下

之平久矣。修之來此。樂其地僻而事簡。又愛其俗之安閒。既得斯泉於山谷之間。乃日與滁人仰而望山。俯而聽泉。掇幽芳而蔭喬木。風霜冰雪。刻露清秀。四時之景。無不可愛。又幸其民樂其歲。物之豐成。而喜與予遊也。因爲本其山川道其風俗之美。使民之所以安此豐年之樂者。幸生無事之時也。夫宣上恩德。以與民共樂。刺史之事也。遂書以名其亭焉。又豐樂亭遊春詩云。「綠樹交加山鳥啼。晴風蕩漾落花飛。鳥歌花舞太守醉。明日酒醒春已歸。」春雲澹澹日輝輝。草惹行襟絮拂衣。行到亭西逢太守。籃輿酩酊插花歸。「紅樹青山日欲斜。長郊草色綠無涯。遊人不管春將老。來往亭前踢落花。」清王士禛晚至豐樂亭詩云。「豐山高不極。到寺已昏鴉。一隴含桃樹。滿山烏柏花。僧雛汲幽谷。活火試新茶。歸去松蘿暝。嚴誠報暮笳。」亭經清全椒薛慰農重修。有重修碑記。



瑯琊寺亦在瑯琊山。寺以山名。清王士禛望瑯琊寺詩云：「瑯琊遺古寺。南望隔層巔。苔蝕陽冰篆。溪流庶子泉。羊牛下山徑。鐘磬發孤烟。未許行勝去。僧房借榻眠。」

### 庶子泉

庶子泉亦在瑯琊山。以唐庶子李幼卿守此鑿泉故名。水清冽異常。宋王禹偁有詩咏之。

### 紫微泉

紫微泉卽幽谷。在豐樂亭下。宋歐陽修守滁。既得釀泉於醉翁亭東南隅。一日會僚屬於州廨。有以新茶獻者。公敕吏汲泉。未至而汲者仆出水。遽酌他泉以進。公知其非釀泉也。窮問之。乃得此泉。公寄謝絳詩云：「滁陽幽谷抱山斜。我鑿清泉水種花。」卽指此。

### 六一泉

六一泉

六一泉在瑯琊山醉翁亭側。傍有石泓泉。清甘如醍醐。瑩如玻璃。故又名玻璃泉。

西澗

西澗在滁縣西。宋太祖入滁。以兵浮西澗。卽此。澗上有野渡庵。唐韋物西澗詩云。「獨憐憐幽草澗邊生。上有黃鸝深樹鳴。春潮帶雨晚來急。野渡無人舟自橫。」清王士禛詩云。「西澗蕭蕭散騎過。韋公詩句柰愁何。黃鸝喚客且須住。野渡庵前風雨多。」

石樓乳

石樓乳在全椒縣西北四十里。與桑根山相連。雙石高聳。狀如樓閣。背山面溪。萬物幽邃。風物至佳。

仙人洞

仙人洞在全椒縣西北五十里馬鞍山上。有石門緣磴而下。客百餘人。後一竇。口僅容一人。後此又復廣寬。石壁中有泉乳細滴。歲久結爲石盤。瑩潔可愛。

### 吉祥庵

吉祥庵在來安縣北舜歌山。元至正二年建。殿宇在厓壁間。自上而下。其地多古樹修竹。濃蔽蔭日。泉流涓涓。風景絕佳。

### 孔雀寺

孔雀寺在來安縣西北二十五里練寺山。唐開元時建。寺前有鐵鑄孔雀。故名。內多古物。如明正統時之鐘。成化時之瓶。殿宇修整。竹木交蔭。風物幽靜。最堪遊賞。

### 琉璃井

琉璃井在來安縣治後。泉極甘潔。雖旱不竭。以琉璃甃砌。水光奪目。投以瓦

礫。聲若笙簧。久而乃止。

# 中華名勝古蹟續編目錄

## 第十編 江西

### 一 豫章……………一一一六

逍遙山 翔鸞洞 天寶洞 施肩吾石室 鄱陽湖 三徐墓 紫極宮 桓伊墓  
始豐山 劍池 從姑山 王臧巖 晒禾石 紅泉 日山 溫泉 龍鳳岩  
王安石故里 明水寺 雲山 寶蓋山 鄒極別墅 馬祖岩 滴乳岩 仙岩  
西岩 洞岩 搗藥山 寶峯山 石泉洞 謝枋得墓 象山 徐岩 僊岩 鐘  
石 章山 月岩 雲岩 蘂雲洞 石城洞 燕洞 排山 鶴山 疊山 岑山  
岩

### 二 廬陵……………一六一—一八

鐵十字 石乳洞 溫泉 落驢橋 三絕碑 仰山 傅擔山 清水岩 楊士奇

墓 石蓮洞 楊萬里故宅 龜山 石城洞 石鐘 石鼓 盤窩山 黃塘巖

梅田山 石廊洞 鐘鼓山 壺山 周公嶺 清風觀 閣阜山 王守仁誓師處

練子寧故里 玉笥山 袁嶺 靈仙洞 桃源洞 羅洞山 曹源洞 龍洞

石壁洞 橫溪寺 安源公園 水晶岩 竹山洞 碧落山 仙聖洞 蒙山洞

洞山寺

### 三

贛南……………二一八—二二六

黃唐山 通天岩 廉泉 塵外亭 王文成祠 大龍山 東龕岩 石龜 大乘

寺銅鐘 統制石 紫雲山 獅子岩 漢仙岩 歙山 玉石岩 羅漢洞 巾子

石 金精山 雲石 陳石山 黃安岩 通天岩 洪石岩

### 四

潯陽……………三六—五五

石谷洞 陶靖節墓 周濂溪墓 東佳泉 義門 玉華洞 仙真岩 垂魚洞

漢陽峯 紫霄峯 含鄱嶺 金竹坪 女兒城 玉川門 石門澗 天池 文殊

---

臺 讀書臺 錦繡谷 東林寺 西林寺 海會寺 簡寂觀 慧遠塔 慧永塔  
雲居山 桃花峯 馬跡山 餘干山 樂嶠山 梅花岩 洪皓故里 佛指泉  
浮碧亭 少華山 歲寒山 膽泉 舒嘯亭 登高山 華林山 藥王山 桃  
源山 魯溪山 攝仙山 龍門山 南山 黃庭堅墓

---

中華名勝古蹟 第十編 目錄



# 中華名勝古蹟續編

## 第十編 江西

### 一 豫章

#### 逍遙山

逍遙山在新建縣西南八十里。道家以爲第四十福地。山之陽舊有玉隆萬壽宮。乃許遜故宅也。相傳遜飛昇時所御錦帷。自雲中墮故宅。鄉人因置遊帷觀。宋祥符中改曰玉隆萬壽宮。

#### 翔鸞洞

翔鸞洞在新建縣西山。敞豁有容。景物清曠。相傳唐明皇公主隱於洞之南。洞側舊有歐陽拾遺書堂。

#### 天寶洞

天寶洞在新建縣西八十里西山最勝處。洞口有石泉。狀如水簾。注山下金鐘湖。宋時嘗遣使投金龍玉簡於此。

### 施肩吾石室

施肩吾石室在新建縣西。去天寶洞十里。肩吾唐分水人。有詩名。元和中舉進士。後退隱洪州西山。終身不仕。所著有西山集。

### 鄱陽湖

鄱陽湖在新建縣東北。跨舊南昌、饒州、南康、九江四府之境。長三百里。闊四十里。卽古彭蠡也。一名宮亭湖。隋時以接鄱陽山。始名鄱陽。形如葫蘆。中爲細腰。湖中有山。曰康郎。擔石、几山、鞦山等。庾嶺以北。仙霞、黟山二山脈以南之水。皆瀦焉。山翠湖光。風物頗佳。誦劉刪詩「滉漾疑無際。飄揚似度空。檣鳥排鳥路。船影沒河宮。孤石滄波裏。匡山苦霧中。」之句。可約略見湖之景況矣。又清趙執信彭蠡湖詩云「顛氣中流轉。煙光四週遭。層波碧離

離秋色寒滔滔。冷然乘風遊。託身任毫毛。仰觀天垂象。旁見林露梢。山移舟向背。目蕩心飄搖。北望千帆走。燦若組紉交。五老雲外笑。人世心魂勞。明當接匡君。舉手爲我招。一在湖中可望見。匡廬故兩詩皆及之。

### 三徐墓

三徐墓在新建縣西山鸞岡。三徐者南唐徐鉉徐鍇及其父延休也。鉉字鼎臣。廣陵人。仕南唐累官吏部尚書。後歸宋爲太子率更令。精小學。著說文解字篆韻譜。弟鍇。南唐進士。累官集賢殿學士。兄弟並有名江左。號二徐。鉉稱大徐。鍇稱小徐。

### 紫極宮

紫極宮舊在南昌縣惠民門外。晉建。面西山之勝。中有吳彩鸞寫韻軒。彩鸞吳猛女。唐文宗太和末。書生文蕭寓紫極宮。一日遊西山與彩鸞遇。因約俱歸。蕭貧不自給。彩鸞寫孫愔唐韻日得一部。鬻之得錢五緡。如是十載。稍爲

人知。乃往越王山。各跨一虎。陟峯巒而去。

### 桓伊墓

桓伊墓在南昌南門外石馬街。伊字叔夏。晉譙國銍人。有武幹。爲王濛劉惔所知。嘗督豫揚二州軍事。後與謝玄共破苻堅於淝水。以功進號右將軍。封永修縣侯。伊謙素不伐。善音樂。盡一時之妙。爲江左第一。得蔡伯喈柯亭笛。嘗自吹之。王徽之赴召京師。泊舟清溪側。伊素不與徽之相識。時岸上過船。中客有識伊者。稱伊小字曰。此桓野王也。徽之便令人謂伊曰。聞君善吹笛。試爲我一奏。伊是時已貴顯。聞徽之之名。便下船踞胡床。爲作三調。弄畢。便上車而去。客主不交一言。

### 始豐山

始豐山在豐城縣南七十里。周十里。高三百丈。爲神仙三十七福地之一。上有藥臼。洗藥池。石壁上有白玉蟾影及手書。山西又有仙人掌。石碁局諸勝。

## 劍池

劍池在豐城縣西南三十里。相傳晉雷煥得龍泉太阿二劍處。池前有石函。長踰六尺。廣半之。俗呼爲石門。舊於此有龍津廟。祀張華。以雷煥配食。相近有寶氣亭。北瞰大江。有唐李德裕劍池賦石碑。

## 從姑山

從姑山在南城縣東南五里。以次於麻姑而名。緣石磴而上數百級。有雙石對峙如門。名鐵關。又數十級乃至。上有伏虎洞。亦名玉洞。又有秋澤巖。巖側有定應泉。

## 五藏岩

五藏岩在南城縣東五十里。俗稱孚子岩。岩前流水縈帶。其東一石如囷。高數百仞。絕頂平曠。有田數十頃。極旱而常稔。名曰天湖。相近又有仙人岩。臨溪峭壁數百仞。有五岩連屬。深廣各數十丈。

### 晒禾石

晒禾石在南城縣東四十里。昔時每屆秋穫。鄉人晒禾其上。宋紹興間雷震石裂成四大字。縱橫交錯不可曉。鏤板傳世。有道人視之曰。此介我黍稷字也。衆熟視之。率以爲然。自是境屢豐。

### 紅泉

紅泉在南城縣西南麻源第三谷。泉自砂中流出。其色紅。宋謝靈運山居賦。訊丹砂於紅泉。卽此。

### 日山

日山在黎川縣西隔溪百步。一名天峯。周六七里。全山皆石。形勢峭拔。日初出必先見。故名。巔有石洞古仙壇。山腰舊有井。深不可測。相傳通海眼云。

### 溫泉

溫泉在南豐縣東南七十里甘露寺前。有泉三支。土人以石螿爲三池。冷池

雖伏如冰。熱池雖臘亦沸。惟溫泉可浴。黎川縣東四十里周湖。亦有溫泉。溫煖清滑。帶硫黃氣。浴之愈疥。

### 龍鳳岩

龍鳳岩在廣昌縣南岩外半里許。小溪沿洄。蒼厓疊峙。山腰架木始通。巖周數丈。中有樓亭。嘉木森陰。東北石厓迴蟠。形勢壯固。

### 王安石故里

王安石故里在臨川縣治東。安石字介甫。號半山。擢進士上第。議論高奇。有矯世變俗之志。神宗時爲相。封荆國公。謀改政治。號稱新法。以無效求補外而卒。安石博覽強記。文章拗折。自成一家。著有臨川集。行於世。

### 明水寺

明水寺在臨川縣西三十里。唐建。有石雙立。號石門關。夾道多古松。開池種蓮。號十里松風。九曲蓮池。遊覽之勝地也。

雲山

雲山在金谿縣東四里。岡巒環合。林木蔥蒨。上有瀑布水。並躍馬試茗。鳴玉三泉。及月石諸勝。風景清佳。最堪游觀。

寶蓋山

寶蓋山在崇仁縣西南。形如寶蓋。一名華蓋山。高二十里。跨崇仁、樂安、宜黃三縣境。巖洞幽勝。下有布水谷。元吳澄嘗隱於此。山麓有黃茅岡。虞集嘗置精舍。上有浮邱先生壇。王郭二真人上昇之地。又有紫元洞。王郭二真人隱處。中有石屏、石座、石棋枰之屬。

鄒極別墅

鄒極別墅在宜黃縣南塗黃嶺下。宋提刑隱居於此。傍有玉井。嘗有道士呂姓來。輒索飲。醉假枕眠。極以珊瑚枕與之。戲擲地而碎。袖往井中浣濯。復完。隨於井上書玉斧泉三字。



## 馬祖岩

馬祖岩在餘江縣南六十里。四面壁立。仰觀有隙如綫。上有瀑泉飛下十餘丈。巖間禪舍極幽邃。相傳馬祖道一於此卓錫。

## 滴乳巖

滴乳巖在餘江縣北五十里。宋尚書湯漢讀書其側。每晨巖下滴乳香一撮。以供爐炷。後漢末乳乃絕。

## 仙巖

仙巖在餘江縣東南七十里。接貴溪縣界。巖半有穴二十四。大小相對。下有溪流。舟人仰視穴中有杵臼、織機、紡車、牀具、水桶、倉板之類。每占其倉板開則歲豐。閉則歲歉。此外又有燕巖、鎮巖、白雲、鹽蒼、鉤藤、馬嘴、揚子、金仙諸巖。相去不過十里。亦足游觀。

## 西巖

西巖在上饒縣南六十里。巖石拔起。中空如洞。內有懸石如螺。滴水垂下。味甘而冷。又有雲巖。亦在縣南六十里。巖削拔。中空如室。相近有柱石巖。屹然聳立如柱。

### 洞巖

洞巖在玉山縣北三十五里。林壑奇秀。中寬平可坐數十人。溪水流。出其聲清壯。遊憩於中。令人興出世之想。

### 搗藥山

搗藥山在弋陽縣東。昔葛元修道於此。有石橋長二十步。有搗藥石。白。旁有石井。水甚甘美。對面爲仙人城山。峯壁峭立。高五十丈。形如層城。上有池水。異常清冷。

### 寶峯山

寶峯山在弋陽縣南三十里。廣袤數十里。白雲吞吐。瀑泉清激。與靈山、龜峯

山並峙。中有石亭。高七十餘丈。又有石橋。長五十餘丈。相近有金鳳山。有石如鳳。

### 石泉洞

石泉洞在弋陽縣北五十里。洞之東四十餘步。有穴。泉滴乳凝爲石。狀如列屏。南北廣六十餘步。中有石室。可坐臥。

### 謝枋得墓

謝枋得墓在弋陽縣南二十五里玉亭鄉。先葬京師。其子定奉柩歸葬於此。枋得字君直。宋末弋陽人。寶祐進士。德祐初元兵寇江東。枋得知信州。逆戰。矢盡兵敗。變姓名入山中。元初求人才。集賢學士程文海首荐。不起。尙書劉夢炎又荐。終不行。福建行省參政魏天祐強之而北。卽日絕粒。至燕京。問太后瀛國公所在。慟哭而卒。世稱疊山先生。

### 象山

象山在貴溪縣西南七十里。連岡疊阜。自閩而來。爲諸山之祖。舊名應天山。宋陸九淵讀書於此。以山形似象。更今名。東厓有繡經石。西厓有歇石。其下壁立萬仞。山之陰有鏡湖。山天成一池。泓然如鑑。其餘岩壑泉石。俱稱絕勝。

徐巖

徐巖在貴溪縣南三里。三峯山下。宋徐紹景讀書於此。林深水遠。洞穴幽邃。有巨石平坦。突出山側如月。捫藤可登而望遠。

僊岩

僊岩在貴溪縣西南。去龍虎山二里。峯巒削立。高出雲表。岩石嵌空。多爲洞穴。房屋窗牖。床榻倉廩之狀。共二十有四。巖總名之曰仙巖。

鐘石

鐘石在貴溪縣北。亦名仙人石。面瞰溪水。背負斷山。屹若鐘形。其腹有巨洞。俗稱神仙窟宅。

## 章山

章山在鉛山縣北四十里。溪旁緣溪深入。土地平衍。上有章巖。竇如半規。內甚宏敞。岩心一石鏡。色白如玉。又有方塘可十畝許。周迴四面皆石。不假雕甍。

## 月岩

月岩在鉛山縣東二十里。其山高一百六十七丈。周十餘里。岩高丈餘。狀如圓龕。前有天然石梁。有雙柱。

## 雲岩

雲岩在鉛山縣西十八里。直嵩山之前。松徑數百步。始至其巔。兩厓怪石崢嶸。有一穴可容百人。雲出則雨降。

## 藥雲洞

藥雲洞在鉛山縣東三十里。山形如乳。名女城山。洞在其巔。循澗六七里始

至有飛瀑臨其前。洞口如門者三。中倚一石。狀如屏。可旋轉。最後懸一龍首。水出不竭。

### 石城洞

石城洞在鉛山縣西二十五里。石門如城。偃僂而入。石室甚朗。其石音類磬。左一洞可容百許人。又西五里有石龍洞。深半里許。

### 燕洞

燕洞在鉛山縣西六十里。前臨澗水。深十餘丈。內有石座。石蓮之屬。

### 排山

排山在廣豐縣東稍北十餘里。羣峯巒岈如劍戟。山前有天柱岩。中深窈。岩左有恠石如虬龍。中開一竇。名石龍洞。

### 鶴山

鶴山在廣豐縣西二十里。相傳山有龍穴。石壁間訇然開峽。上橫石梁。矯如

鶴頸。可四五尋。有飛泉歎激而出。溉田甚廣。上有蘇岩。深窅不可入。西南接七峯岩。入上饒界矣。

### 疊山

疊山在橫峰縣北八十里。其脉由上饒縣靈山來。重巒疊嶺。岩嶢峻絕。宋謝枋得築室讀書其下。因自號疊山。

### 岑山岩

岑山岩在橫峰縣北二里許。石洞空濶。中舊有觀音閣、金剛樓、鐵瓦觀諸勝。其後則有馬岩、懸崖百尺。岩中有泉。泠泠不絕。

## 二 廬陵

### 鐵十字

鐵十字在吉安南門外江涯。題云保大（南唐帝李璟年號）二年五月日。置重一千三百觔。世傳南唐時造戰艦以此繫纜。

### 石乳洞

石乳洞在宜春縣東三十里。濶數丈。深一里許。高十餘丈。亦名玉室山。青壁若虛。萬象森羅於其前。頗堪遊觀。

### 溫泉

溫泉在宜春縣西南。通志在西南三十里定光院前。泉凡三出。一在東岸之上。僧鑿以爲池。一湧出江心巨石中。其石類釜。上寬五六尺許。平坦可坐。一在西岸之下。

### 落驢橋

落驢橋在宜春縣東三里。舊名赤板橋。唐貞觀初。宜春人彭伉登第。其妻與郡吏賁之妻。姊妹也。妻族賀伉。坐上皆名士。獨飯賁于後閣。賁自是力學。一舉擢上第。伉方過此橋。聞之失聲墮驢。故名。又名湛郎橋。

### 三絕碑



三絕碑在宣春舊府學內。潘光祖輿地備考云。宋州守祖無擇建學。吁江李觀記。京兆章友直篆額。河南柳淇書。世號三絕。

### 仰山

仰山在宣春縣南八十里。山勢峻嶒。府之鎮也。其最勝處曰集雲峯。山中石徑縈迴。飛瀑湍駛。夙異人境。山下有唐鄭谷讀書處。又有小仰山。在縣南三十里。晉鄧表修煉於此。上有星壇。石臼。藥竈遺跡。

### 傅擔山

傅擔山在泰和縣西北五十里。峻險阨仄。攀援轉寘。而後可度。西南有石笋峯。尤峭拔。下有九龍潭。及玉溪泉。泉凡四十八竅。至岩前復合爲一。

### 清水岩

清水岩在泰和縣北五十里。廣可容數百人。深不可極。下有石穴。亦可容百許人。有泉自岩下入石穴中。舊傳有人持糗糧而入。度行十餘里。聞撒網聲。

懼而還。

### 楊士奇墓

楊士奇墓在泰和縣北五里楮原。士奇名寓，以字行。明泰和人。少孤貧，力學。建文初，用薦入翰林，與編纂事。成祖時，官大學士。仁宗朝，進少保、兵部尚書。英宗時，進少師，卒諡文貞。士奇歷相四朝，文章德業，爲一時輔臣之冠。

### 石蓮洞

石蓮洞在吉水縣西北九十里。盤石屹立，濶三四丈，中空如屋。洞口有羅漢松，甚奇古。明羅洪先題曰梅關。

### 楊萬里故宅

楊萬里故宅在吉水縣西北五十里南溪上。鶴林玉露云：誠齋年未七十，退居南溪之上。老屋一區，僅蔽風雨。卽此。清王士禛吉水道中望楊誠齋故居詩云：「江行盡日愛清暉，峽遠江平碧四圍。幾處峰青臨水照，一羣魚翠拂

船飛雲陰澹澹將成雨。嵐氣濛濛欲溼衣。髣髴南溪楊監宅。蒼苔白石繞岩扉。

### 龜山

龜山在安福縣西六十里。多奇石。其下一山。狀如斧劈。兩崖垂下如帷幄。惟亭午見日。一名九日巖。一名壁峽。後有洞。虛曠可容數十人。

### 石城洞

石城洞在安福縣西一百二十里。石勢環把如城。洞門廣丈餘。中可容千人者數處。前後之地。相去五里許。有澗水從嶺後流出。溉田數百畝。舊名石廊洞。里人劉元卿改今名。

### 石鐘

石鐘在安福縣西羅漢寺旁。有嶺曰陽岡。下瞰碧潭。巨石倒垂崖中。形狀若鐘。

### 石鼓

石鼓在安福縣西資福寺旁。有溪曰灣潭。巨石錯立。中有一石如鼓。或曰。宋熙寧時鼓嘗自鳴云。

### 盤窩山

盤窩山在遂川縣西南。盤鬱秀麗。有龍洞。懸厓百尺。松竹森列。溪水環抱。爲一邑之勝境。

### 黃塘岩

黃塘岩在萬安縣東南一百八十里。巖中嵌空玲瓏。若樓閣狀。有石鼓、石鐘。又有蛟穴。出泉。四時不竭。

### 梅田山

梅田山在永新縣東二十五里。平田特起。三峯峭立如筆架。下如寶仙聖洞。深數百步。其陽爲玉虛洞。寬敞可容千人。巨石壁立十數仞。上開天門。深可

一二里。右爲合壁洞。洞門雙闕如合扉。

### 石廊洞

石廊洞在永新縣西北一百里。洞深一二里。中有石幢、石鼓等。巖竇通後嶺。

### 鐘鼓山

鐘鼓山在蓮花縣東五里。疊嶂崇岡。險砭礪砭。中有石形如鐘鼓。扣之發金革音。

### 壺山

壺山在蓮花縣東南五里。高侵碧落。翠點晴空。一名元陽洞。洞中四隅碧色黯蒼。頂有石環偉瑩圓。精光奪目。如玉壺狀。故名。

### 周公嶺

周公嶺在蓮花縣東北二十五里。上有羅家仙岩。高聳如屋。及伏虎岩、鴉石、獅石、蜈峯、蛟峯、秀溪、澄潭諸勝。

### 清風觀

清風觀舊在蓮花縣北三十里。明水樂劉髦微時。過其地假寐。觀外是夕。道士夢龍繞觀門。明日款以優禮。髦遂下帷觀中。後髦顯。請勅賜讀書臺額。以表之。題一聯於柱云。「玉筍派分修道所。朝廷勅賜讀書臺。」

### 閣皂山

閣皂山在清江縣東四十里。連亘二百餘里。跨樂安、新淦、豐城三縣地。其形如閣。色如皂。有峯六、嶺四、岩二、原五。其餘泉石池塘之勝。參差不一。道書以爲三十三福地。

### 王守仁誓師處

清江縣東北三十里清江鎮。亦名樟樹鎮。卽故新淦縣址。東北去豐城縣七十里。爲南北要津。明王守仁討宸濠。自吉安會軍清江鎮。誓師於此。清王士禛詩。世「豹房虎圈氣如雲。行在從容露布聞。誰識書生離講席。絕勝三十

## 六將軍。

### 練子寧故里

練子寧故里在新淦縣東山。祖墓及母夫人墓俱在焉。子寧名安。以字行。明新淦人。洪武十八年廷試第二。授修撰。累遷工部侍郎。建文初與方孝孺。特見信用。改吏部左侍郎。尋拜御史大夫。燕師起。李景隆北征。屢敗。召還。子寧數其衆。請誅之。不聽。因大哭。曰。壞陛下事者。此賊也。願卽死。帝爲罷朝。燕王卽位。執子寧。至。語不遜。遂磔死。族其家。姍戚俱逮。戍邊。福王時。贈太保。諡忠貞。子寧善文章。其遺文曰。金川玉屑集。李夢陽嘗立金川書院以祀之。

### 玉笥山

玉笥山在峽江縣東南四十里。舊名羣玉峯。相傳漢武帝元封元年。巡行南部。受上清籙於羣玉之山。見有玉箱如笥。委壇中。忽失去。因改今名。道書以爲第三十七洞天。有三十二峯。二十四壇。十二臺。六洞。七源。二塢。四谷。三十

二澗。其餘潭、石、宅、井、坡、嶺、名迹不可悉數。元揭傒斯萬壽承天宮碑云。天下稱名山。在大江之西者有三。曰匡廬。曰閤皂。曰玉笥。而玉笥尤爲天下絕境。

### 袁嶺

袁嶺在分宜縣西北十餘里。相傳後漢袁閔避匪於此。下有洪陽洞。仙人葛洪。婁陽樓真處。洞門東向。高數十丈。初入平夷明爽。益西則盤迴峻阻。石室深邃。中有流泉。春溢冬涸。又有小洪陽洞。在洞之頂。廓大可容。

### 靈仙洞

靈仙洞在分宜縣北三十里。去地三十丈。峻嶮崎嶇。仰視石室。如雲霞往來狀。中有石磨、丹爐諸勝。

### 桃源洞

桃源洞在分宜縣北一百三十里。洞口空濶。東北行半里許。有石室。折而北。泉石益勝。不可窮詰。距洞二里有風洞。居山之陽。隘不可入。旁有流泉。水石



參錯清風出焉。

### 羅霄洞

羅霄洞在萍鄉縣東一百里。延袤百餘里。上有羅霄洞。旁有葛仙壇。壇生二竹。風動如掃。人謂之掃壇竹。壇側有黃龍壇。山下又有石潭。深不可測。袁江之水出焉。

### 曹源洞

曹源洞在萍鄉縣西北二十里。洞極深濶。中有石狀如觀音象。另一小石如人伏於下而禮拜者。

### 龍洞

龍洞在萍鄉縣北五十里。門如半月形。有龍溪二字刻於上。中多巨石。玲瓏剔透。又有清泉。涓涓外流。

### 石壁洞

石壁洞距株萍鐵道安源站二十餘里。列井而入。石狀萬殊。皆肖人物。有井幽深莫測。

### 橫溪寺

橫溪寺在縣西五里。有泉。有池。有避塵軒。濯纓亭。諸勝。景物清幽。最適遊觀。

### 安源公園

安源公園在株萍鐵道安源站南山窩。中有環翠軒。倚雲軒。月波亭。聽濤館。船廳。諸勝。林木翳翳。峯巒峻秀。禽魚幽適。烟水清明。風景絕佳。最宜遊覽。

### 水晶岩

水晶岩在萬載縣西五十里。峯頂山之西。岩中飛瀑流瀉。如撒珠玉。

### 竹山洞

竹山洞在萬載縣南二十里。水經其中。卽石洞水之上源也。前後兩門。深五里許。內虛敞高丈餘。有石平廣如田。又有石穴。俯仰若屋。

## 碧落山

碧落山在高安縣治。一名鳳凰山。相傳唐高祖時，應智頊刺郡，鳳凰集此。故名。山右有五龍岡。前臨蜀水。有李八百洞。一名速仙洞。又有春洞。每立春日，則陽氣吹灰出外。

## 仙聖洞

仙聖洞在上高縣西五十里。中有石佛、石鐘等類。九峯踞其巔。奇秀峻拔。莫可名狀。

## 蒙山洞

蒙山洞在上高縣南蒙山。有上下兩洞。上洞不可遊。下洞廣函丈。深不可究。中有石佛、石僧、獅子座、羅漢座等類。又有石立岩間。上下無所附麗。謂之無根石。

## 洞山寺

洞山寺在宜豐縣東北五十里太平鄉。卽普利寺。唐宣宗時良价禪師建。舊有宋太宗仁宗御書飛白草字及經傳等六十卷。并鍾傳鐵釜文。楊行密銅鐘。

### 三 贛南

#### 黃唐山

黃唐山在贛縣南。輿地志云。山右行六里有石室。口方八尺。如數十間屋。上通天窗。下有方榻。二石人巾櫛而坐。旁有小石室七所相通。悉有石人。室前時有車馬跡。春夏草不生。無諸毒蟲。林木繁茂。水石幽絕。蓋靈仙窟宅也。

#### 通天岩

通天岩在贛縣西二十里。空洞如屋。有穴透其巔。怪石環列。林木葱蘢。有寺藉石窟架木爲廬。曰通天。緇流居之。幽靜清絕。如在塵外。修竹成陰。陽光不到。有蘇子瞻王守仁詩詞石刻。院落兩院。懸岩斜聳。刻石佛甚多。大小殊別。

附近有岩。境地幽勝。游者忘歸。名曰忘歸。有忘歸岩三字石刻。

### 泉廉

廉泉在贛縣東南四里。劉宋文帝時。一夕霹靂。忽泉湧出。時郡守以廉名。故曰廉泉。宋蘇軾詩云。「水性故自清。不清或撓之。君看此廉泉。五色爛摩尼。廉者爲我廉。何以此名爲。有廉則有貪。有慧則有癡。誰爲柳宋元。孰是吳隱之。漁父足豈潔。許由耳何淄。紛然立名字。此水了不知。毀譽有時盡。不知無盡時。竭來廉泉上。捋鬚看鬢眉。好在水中人。到處相娛嬉。」

### 塵外亭

塵外亭在贛縣龔公山頂。形勢最高。城郭山川。一覽無餘。宋蘇軾詩云。「楚水澹無塵。贛水清可厲。散策塵外游。揮手謝此世。山高惜人力。十步輒一憩。卻立浮雲端。俯視萬井麗。幽人宴坐處。龍虎爲斬薙。馬駒獨何疑。豈墮山鬼計。夜垣非助我。謬敬欲其逝。戲留一轉語。千載豈攘袂。」

### 王文成祠

王文成祠在贛縣舊府學右。祀明新建伯王守仁。清王士禛有贛州謁王文成公祠詩云：「新建當年此誓師。森然松柏見靈祠。軍聲不藉條侯壁。籌策唯應漢相知。萬古許孫同廟食。一時張桂太傾危。後來論定煩青史。峴首猶存墮淚碑。」

### 大龍山

大龍山在信豐縣南一百二十里。一名壺山。山有岩洞數十。又有龍井。多產紫草異物。有異如白蓮。附近有柏山。上有龍湫。

### 東龕岩

東龕岩在興國縣東北。唐鍾紹京讀書處。前後有讀書岩、試劍石、靈湖、石舫、石筍、筆架山、線洞、環鯉、瀑布、泉、僧寺。共號十景。

### 石龜

石龜在興國縣儒林鄉。石圓如龜。項背俱備。彷彿八卦形象。逐月隨斗杓旋轉。土人疑其怪。移置他所。翌日復歸其處。累驗皆然。因時祀之。

### 大乘寺銅鐘

銅鐘在興國縣治大乘寺。唐末鑄。宋紹興初。一夕忽失去。未幾。有客言比者。文潭漁者得一鐘。鬻於天寶寺。扣之無聲。僧詣天寶寺物色得之。贖之不許。乃相約日扣之。不鳴。卽非寺中物。扣之鳴。卽寺中物也。天寶僧屬擊無聲。大乘僧一擊卽鳴。遂載以歸。

### 統制石

統制石在興國縣太平鄉。宋末統制鞏信。從文天祥勤王。元帥李恆追至方石嶺。將及。信以短兵接戰。元兵疑有伏。不敢進。信坐巨石。箭雨集被體。屹不動。至死不僵。後人因呼爲統制石。行旅遇此必式。

### 紫雲山

紫雲山在會昌縣南一百里。高數百仞。鑿石爲磴。計四百數十級。有奇。名雲梯石。紆迴蜿蜒。西折數步。爲趙公岩。又有仄徑。捫蘿躡跡。始達其巔。有沃衍數十畝。及流泉松竹之勝。

### 獅子岩

獅子岩在會昌縣西北九十里。洞壑幽深。嘗有人燃炬以入。中有石室數間。石笋峭刻。溪流清冽。不知其源。

### 漢仙岩

漢仙岩在會昌縣東南一百二十里。去羊角水鎮二里。舊名漢山。峭峻聳拔。下臨漢溪。深廣數丈。有石竇僅容一人。匍匐而入。其中奇勝森列。殊堪游觀。

### 欣山

欣山在安遠縣南十五里。高峻插天。盤根數百里。有清池靈岩。橘樹異竹。石室石牀之屬。景物極佳。游者欣然。故名欣山。



## 玉石岩

玉石岩在龍南縣北五里。有上下二岩。上岩石瑩如白玉。山半有洞。中廣數十丈。宋太宗賜書一百二十卷。里人依岩建閣藏之。後爲兵燬。此爲上岩。岩左又一竇。重重深入。進登高臺。有大竇。通明。亦名通天岩。空濶可容百人。明正德十六年。王守仁征瀧川三泐班師。作平南記刻於壁。題曰陽明小洞天。此爲下岩。岩後又有六七洞。視二岩尤勝。皆堪遊觀。土人稱曰新岩。

## 羅漢洞

羅漢洞在大庾縣舊鬱林鎮西八里。厓石如門。中有石十八。若羅漢狀。有清泉涓涓下流。有石梁長丈餘。危峻人不敢渡。

## 巾子石

巾子石在南康縣北二百餘里。石形遠望如巾。故名。高峻聳起。橫互數十里。巔有岩。廓大可容。中有瀑布泉。歎瀉而下。

### 金精山

金精山在寧都縣西北十五里。相傳漢金華人張芑女麗英入山修道。吳芮聞而聘焉。麗英勿許。曰：吾爲金星之精。降治此山。言訖。紫雲鬱起。失女所在。故名山曰金精山。或曰吳芮所鑿。山多奇峯。不可枚數。最著名者凡十二。曰蓮花、合掌、仙桃、凌霄、黃竹、披髮、望仙、三巘、伏虎、翠微、瑞竹、石鼓。峯頂皆石。望之如雲。其中石洞幽邃寬大。可容萬人。道家以爲第三十五福地。

### 雲石

雲石在寧都縣東南二十里。狀如陣雲。岩谷幽勝。林木奇異。其巔廣百餘丈。有巨湖。其對峙者爲螺江。

### 陳石山

陳石山在瑞金縣東北。山岩深廣十丈餘。上有將台、點兵寨。內有劍門、九曲洞、龍湫、龍池。外有峯巒、泉石之勝。皆適遊覽。

## 黃安岩

黃安岩在瑞金縣西四十里。一名月圓岩。一名皇恩岩。深廣容百人。橫濶十餘丈。前有二潭。曰小龍。曰龜池。輿地紀勝云。皇恩岩有龍穴。水中有二珠。每秋霽月澄。珠時出游。水際熒然。亦神異也。

## 通天岩

通天岩在石城縣南十五里。石壁嶙峋。深若巨室。洞中惟一竅。上通鳥道。盤旋而上。其巔乃方平若原。前後石數十丈。皆似龍鱗。雖雕繪不及。有泉味極清濃。

## 洪石岩

洪石岩在石城縣南四十里。攀磴而入。石門寬衍如屋。絕頂有石泉。其北爲出米岩。南爲師子岩。四面峭壁。路止一線。附近有梅子龍頭。牛蹄。三仙。金雞等岩。境地幽峭。亦足遊觀。

#### 四 潯陽

##### 石谷洞

石谷洞在九江縣南六十里。上有大石覆之。人偃僕而入。內高數丈。杳冥窈遠。其深莫測。

##### 陶靖節墓

陶靖節墓在九江縣西南楚城鄉面陽山麓。靖節名潛。一名淵明。字元亮。晉柴桑人。侃曾縣。少有高趣。博學善屬文。家貧。起爲州祭酒。不堪吏職。乃解去。旋召爲主簿。不就。後爲彭澤令。郡遺督郵至。縣吏白應束帶見之。潛嘆曰。吾不能爲五斗米折腰。向鄉里小兒。卽日解印綬去職。賦歸去來辭。義熙末。徵著作郎。不就。自以曾祖晉世宰輔。不肯屈事後代。所著文章。皆題年月。義熙以前。明書晉代年號。自永初以來。唯云甲子而已。宋元嘉中卒。年六十三。世稱靖節先生。

## 周濂溪墓

周濂溪墓在九江縣西栗樹嶺南母墓之左。墓前有坊。濂溪名惇頤，字茂叔，宋道州人。累官廣東轉運判官提點刑獄。尋知南康軍。因家廬山蓮花峯下。胸懷灑落，如光風霽月。所著有通書、太極圖說，爲宋理學之祖。二程皆其弟子。卒，追封道國公。諡曰元。從祀孔子廟庭。其所居名濂溪，世因稱爲濂溪先生。

## 東佳泉

東佳泉在德安縣西東佳山紫岩下。一名紫岩泉。泉有上下二竅。上竅流則下竅乾絕。下竅流則上竅乾絕。三日一周。或云：泉水天晴則西流，雨則東流。若雨晴未定，則西有小水。泉西有石洞，深不可極。旱則于此禱雨，秉炬入。進四十里有湖。

## 義門

義門在德安縣西北六十里。南唐陳氏特立之門望也。陳宜都王叔明之後伯宣。卜居德安。子崇爲江州長史。置園田爲家法。戒子孫擇羣從掌其事。建書堂於東佳山下。教誨子弟。僖宗時嘗詔旌其門。南唐時乃爲立義門。免其徭役。崇子袞。袞子昉。十三世同居。長幼七百口。不蓄僕妾。上下敦睦。人無間言。每食必羣坐廣堂。未成人者別有一席。有犬百餘。亦置一槽共食。一犬不至。羣犬亦皆不食。宋開寶初。知州張齊請仍免徭役。淳化初。常苦食不足。詔本州每歲貸粟二千石。見宋史孝義傳。

### 玉華洞

玉華洞在瑞昌縣東二十五里。洞內多奇形異跡。千態萬狀。不可殫述。

### 仙真岩

仙真岩在彭澤縣南。石門裂峙。高五丈許。中有清流。其旁爲玉壺洞。深七八里。有水繞洞而出。可引以溉田。

## 垂魚洞

垂魚洞在彭澤縣西南五十里。內有小溪。有石如魚形。垂在洞中。又有石橋。棋局石乳。洞們高數丈。深廣可遊。

## 漢陽峯

漢陽峯在星子縣北廬山絕頂。望數百里。極目江漢。故名。東至桃林。西訖康王谷。其巔平曠。鮮喬木。下視濛濛。窈不見底。雖六月亦寒慄。有峭壁曰禹王厓。峯南與黃岩瀑布源相接。

## 紫霄峯

紫霄峯亦在廬山縣。去星子縣二十五里。一名上霄峯。下有上霄源。高壁緬然。與霄漢接。相傳有大禹刻石。誌其丈尺里數。在石室中。內極幽深。明時有好事者。縋而下。摹得百餘字。皆不可辨。僅有鴻荒濛余。乃攢六字可識。

## 含鄱嶺

含鄱嶺在廬山大月山西南。面鄱陽湖。若有吞吸之狀。故名。嶺之南中豁。爲含鄱口。又西南爲歡喜嶺。乃五老之大路。明桑喬云。含鄱嶺者。九奇峯東第一峯也。以含鄱口故別出。山橫互。燁燁如火。又如猛士乘馬而馳。勢甚壯偉。附近爲太乙峯。可攀援而登。清方文有含鄱嶺至太乙峯詩云。一侵晨獨出含鄱口。千里鄱湖一嶺函。但使短籐窮碧巘。何妨細雨濕青衫。林中黯澹高低樹。霧裏微忙來去帆。不是探奇索隱者。誰能踏雪上巉岩。」

### 金竹坪

金竹坪在廬山黃龍山南。清吳闡思匡廬紀游云。金竹坪基址平廣。鐵鉛上霄。諸峯列於前。天池香爐諸嶠環於後。釋今覲詩云。一情與廬山冥。幽思無動定。適爾前峯游。渺然絕意境。洞壑寂無聲。松杉微有徑。疏籬綠槿齊。密竹朱門映。古殿拂長松。虛堂閒落景。山川理本奇。緣會趣自永。久坐發微吟。明月粲東嶺。」坪北有蓮花庵。在蓮花峯下。舊董奉館亦在於此。明桑喬引九



江新志云。董杏館在蓮花。峯下今有杏林遺跡。

### 女兒城

女兒城在廬山租界上。乃一壑也。非真有城隍。相傳明太祖嘗練兵於此。城東北爲大月山。登臨可以眺遠。清程頌萬過女兒城詩云。一。金風獵獵犯霄行。短褐輕輿眼倍明。誰識東南天子障。更分中外女兒城。蜿蜒十里神媯鑄。合沓諸峯走馬平。足底秋原正敷淺。那堪容易亂雲生。」

### 玉川門

玉川門在廬山。桑喬云。玉川門當三疊水口。其兩厓壁立萬仞。澗從中關路。行處兩石相磕。中穿一竇。遊者低首而進。其石色白如玉。故名。清施閏章詩云。一。昨夜厓前龍象吼。百泉迸出雷震走。玉川雨後白雲多。片片從風飛戶牖。攀蘿倚石轉崔嵬。鐵壁千尋掌上開。因岩結屋誰能住。好跨青牛歸去來。

### 石門澗

石門澗在天池山文殊寺南。水經注廬山之北。有石門水。水出嶺端。有雙石高峙。其狀若門。水導雙石之間。懸厓飛瀑。近三百步許。下散漫數千尺。望之若曳。飛練于霄中矣。宋謝靈運登石門最高頂詩云。一晨策尋絕壁。夕宿在山棲。疏峯枕高館。對嶺臨迴溪。長林羅戶庭。積石擁階基。連岩覺路塞。密竹使徑迷。來人忘新術。去子惑故蹊。活活夕流駛。噉噉夜猿啼。沈冥豈別理。守道自不攜。心契九秋幹。目翫三春蕘。惜無同懷客。共登青雲梯。唐白居易石門澗詩云。一石門無舊逕。披榛訪遺跡。時逢山水秋。清輝如古昔。常聞慧遠輩。題詩此岩壁。雲覆莓苔封。蒼然無處覓。蕭疏野生竹。崩剝多年石。自從東晉後。無復人遊歷。獨有秋澗聲。潺潺空旦夕。

### 天池

天池在廬山天池山頂。廣二十尺。長四十餘尺。宋范仲淹詩云。一岳頂見仙。

池。神異安可度。初謂無波濤。雲雷有時惡。乘此澄清間。晉纓可以濯。」

### 文殊臺

文殊臺在天池山舊天池寺旁。昔上有文殊閣。今惟臺基存耳。臺西有邃谷。曩時每夜分有火光出。錙流呼爲佛燈。明王守仁文殊臺夜觀佛燈詩云：「老夫高臥文殊臺。拄杖夜撞青天開。撒落星辰滿平野。山僧盡道佛燈來。」

### 讀書臺

讀書臺在秀峯寺後。南唐李後主嘗讀書於此。臺下有宋黃庭堅書七佛偈石刻。及明王守仁平宸濠紀功碑。清王士禛有王文成紀功碑詩云：「文成摩厓碑。其字大如手。萬古一涪溪。光芒同不朽。」

### 錦繡谷

錦繡谷在佛手岩之西。中多奇花異草。紅紫匝地。如被錦繡。或云昔慧遠蒔藥處也。有黃谷洞。爲黃谷禪師宴坐之所。附近摩厓有宋歐陽修贈劉凝之

廬山高詩。詩云。一廬山高哉。幾千仞。兮根盤幾百里。峨然屹立乎長江。長江西來走其下。是爲揚瀾左蠡兮。洪濤巨浪。日夕相衝撞。雲消風止。冰鏡淨。泊舟登岸而望遠兮。上摩青蒼以晻靄。下壓后土之鴻龐。試往遊乎其間兮。攀緣石磴。窺空筥。千厓萬壑。響松檜。縣崖巨石飛流淙。水聲聒聒亂人耳。六月飛霜灑石缸。仙翁釋子亦往往而逢兮。吾嘗惡其學幻而言嘯。但見丹霞翠壁遠近映樓閣。晨鐘暮鼓杳靄羅旛幢。幽花野草不知其名兮。風吹霧溼香澗谷。時有白鶴飛來雙。幽尋遠去不可極。便欲絕世遺紛龐。羨君買田築室老其下。插秧成疇兮。釀酒盈缸。欲今浮嵐暖翠千萬狀。坐臥常對乎軒窗。君懷磊砢有至寶。世俗不辨珉與缸。策名爲吏二十載。青衫白首困一邦。寵榮聲利不可以苟屈兮。自非清泉白石有深趣。其意硃碑何由降。丈夫壯節似君少。嗟我欲說安得巨筆如長杠。」

東林寺

東林寺在廬山麓舍利塔南。晉孝武帝太元九年建。晉僧慧遠道場也。舊有白蓮社。十八高賢影堂。蘇白堂。銅塔及名人石刻。寺前有虎溪橋。曰虎溪橋。唐李白東林寺夜懷詩云。「我尋東林寺。獨往謝城闕。霜清東林鐘。水白虎溪月。天香生虛空。天樂鳴不歇。冥坐寂不動。大千入毫髮。謔然冥真心。曠劫斷出沒。」

### 西林寺

西林寺在廬山香谷南。與東林寺相對。晉僧慧永嘗居之。寺後有塔。舊時之石刻須菩提像。張僧繇昆盧像。唐垓釋迦像。歐陽詢碑等。今已無存。

### 海會寺

海會寺在五老峯下。僧至善建。爲廬山五大叢林之一。寺前有荷池。石欄圍之。欄悉鑄佛像。寺內有藏經閣。貯僧普超血書經八十一卷。另有元趙孟頫金繪佛像冊。及僧心月鑄五百羅漢搨本。皆屬珍品。

### 簡寂觀

簡寂觀在金雞嶺下。劉宋時吳興陸修靜居之。舊名太虛觀。後修靜卒。諡曰簡靜。因以名觀。宋陳堯佐詩云「清泉澤吾土。秀氣惟廬山。中有簡寂觀。祕邃非人間。潮陽陳希元。駐駕來躋攀。坐久塵慮息。直恐真風還。昂昂鶴骨人。儼儼霓裳斑。自顧塵態甚。苦語增羞顏。松枝鳴蕭蕭。瀑布聲潺潺。終當脫塵纓。來此逍遙間。」

### 慧遠塔

慧遠塔在東林寺西下方塔院內。慧遠姓賈氏。雁門樓煩人。年十三通六經。莊老。二十一聞沙門道安講般若經。豁然開悟。遂與弟慧持俱出家。太元中。至廬山立精舍。江州刺史桓伊建寺居之。曰東林。與衆百二十三。結白蓮社。同修淨土之業。其間譽望最著者。有劉程之。雷次宗等十八人。居山三十年。跡不入俗。義熙十二年終。年八十三。

## 慧永塔

慧永塔在西林寺西二百步。慧永河南繁氏子。年十二出家。事曇竺。太元初至潯陽。刺史陶範爲之立寺。曰西林。而永又立庵於寺後山上。至其處。嘗聞異香。因號曰香谷。有一虎同居。人至輒驅去。陸游以慧永爲慧遠之弟。誤。

## 雲居山

雲居山在永修縣西南三十里。紆迴峻極。頂常出雲。一名歐山。世傳歐岌先生得道於此。故云。山有湫澤。湧洩垂流。三十餘丈。形如曳布。謂之布水。山陽有鵝公嶺。走馬嶺。山陰有陽均。有大小馬頸。馬頸者以兩山斷絕。中止一線。相屬。從二百餘步。衡尺有咫。兩旁皆深谷。無影。行者股慄。山上羣峯環抱。凡十有一。俱削如城郭。而上復開豁。有田有湖。

## 桃花峯

桃花峯在永修縣西南七十里。聳入雲際。陟其巔。目極千里。下爲黃荆洞。險

峻不可登。行者鑿孔。歷級而上。洞中有古墓。生鐵鎔固。峯上有馬尾泉。曲折湍激。至巖陡處。直下如水簾。嘗有桃花流出。峯之東三里。爲下城洞。亦有鐵封墓。

### 馬跡山

馬跡山在鄱陽縣東北二十里。山勢縈旋。衆峯環拱。道書以爲五十二福地。王遙煉丹其上。有煉丹井。藥盂。斗壇遺跡。遙字伯遠。晉鄱陽人。得仙術。能治病。不用符水。鍼藥。但用八尺布帕敷地。令瞑目坐上。即愈。若有邪魅。晝地作獄。叩石呼之。其物自斃。常令弟子以九節杖負一竹篋隨之。冒風雨行。衣皆不溼。一日見兩炬。導入石室中。遇二人。遂同去。越三十餘年。人又見遙在馬跡山煉丹焉。

### 餘干山

餘干山在餘干縣東門外。一名羊角山。山有兩峯。曲轉相向。狀如羊角。因名。



唐天寶六年，敕改曰餘干。又以平地崛起，巍然如冠，名曰冠山。山上多奇樹怪石。前瞰琵琶洲。唐陸羽於此煎茶。舊有龍泉池、雲風堂、乘風亭。今以荒圯。山前有二嶺，下瞰市湖。左曰烟波，右曰白雲。

### 樂嶠山

樂嶠山在樂平縣東北八十里。其東爲葛山。兩山間有洪巖，風岩、氣岩、天井、桐木、冷水諸岩。而洪岩特著。山腰有石室。南北相通，方四十丈。雲氣泉聲不絕。山中多奇石。洪氏世居其麓，曰洪源。

### 梅花岩

梅花岩在樂平縣東北六十餘里。岩深三十丈，南北相通。有井、有田、有竈。有澗、有池，皆石也。池深莫測。一山之水歸焉。上舊有梅樹數十株。每屆花時，冷蕊疎枝，風景特佳。

### 洪皓故里

洪皓故里在樂平縣東洪岩下。其墓則在鄱陽縣東故縣鎮。其長子适墓在縣北仁義鄉。次子遵墓在縣北芝山。季子邁墓在縣西北三十里龍吼山。皓字光弼。宋樂平人。博學強記。負奇節。政和間舉進士。嘗出爲州守。有德政。百姓呼爲洪佛子。建炎中。充大金通問使。金人拘之。迫使仕。執不可。流遼冷山。甯金十三年。抱印符臥起。紹興十三年。乃還。時人比之蘇屬國。以論事忤秦檜。出知饒州。又徙袁州。至南雄卒。諡忠宣。所著有文集五十卷。及帝王通要。姓氏指南。松漠紀聞等書。适字景伯。號盤洲。紹興中。與弟遵同中博學鴻詞科。官至尙書右僕射兼樞密使。卒。諡文惠。遵字景嚴。孝宗時。拜同知樞密院事。後以資政殿學士。提舉洞霄宮。卒。諡文安。邁字景虛。號容齋。亦中博學鴻詞科。紹興末。使金。書用敵國禮。金人怒。鎖使館。後還。孝宗拜爲中書舍人。以端明殿學士致仕。卒。諡文敏。所著有容齋五筆。夷堅志等書。

佛指泉

佛指泉在浮梁縣西能仁寺前。井底有石如指。其泉從上湧出。味甚甘冽。冬夏不竭。亦曰市佛泉。

### 浮碧亭

浮碧亭舊在浮碧縣南門外昌江南。宋縣令張景修詩云。「一泓秋水不見底。十里曉山無盡頭。」

### 少華山

少華山在德興縣東三十里。一名三清山。高五百丈。盤互數百里。跨越數縣。諸峯羅立。岩洞幽奇。最高者爲玉京峯。值天氣晴朗。匡廬彭蠡。明滅可見。

### 歲寒山

歲寒山在德興縣西南五里。又名師子山。屹然臨溪。素崖壁立。白波奮流。自成潭渚。水石搏擊。噌吰鏗鞳。宋至和間。周冕隱居於此。鐫歲寒二字於上。汪學士藻亦嘗居於山。

### 膽泉

膽泉在德興縣。有二。一在縣東十五里。亦曰銅泉。相傳以泉浸鐵數日。輒類朽木。刮取其屑。鍛鍊成銅。元史至正十一年。中書省臣張理獻言德興三處膽水浸鐵。即可以成銅。宜各立銅冶場。卽此一在縣東三十里。

### 舒嘯亭

舒嘯亭舊在德興縣治東雷山巔。旁有岩曰香石岩。有洞曰黃龍。右有天池。闊僅尋尺。盛夏隆冬。其水不竭。左有涸池。深數尋。雖久雨不注。勺水。宋蘇軾詩云。「勝覽雷山舒嘯亭。」卽此。

### 登高山

登高山在奉新縣治北百步。又名龍山。又名獅山。其巔平坦。舊爲射圃。每九月九日。士女登高於此。山北有井曰馮井。舊有牆延袤數百尺。俗呼倉城。相傳漢時馮氏倉場故址。

## 華林山

華林山在奉新縣西南五十里。三峯聳峻。高險危秀。周迴百里。山腰有李八百石洞。洞南舊有浮雲宮。宮前有劍池。丹井。相傳浮邱公嘗隱居於山。

## 藥王山

藥王山在奉新縣西北五十里。登山必盤險而上。及頂平濶。可二十里。中有湖水。澄深無底。湖岸舊多花木。風景頗佳。西南有琵琶峯。雷公岩。鄒公洞。龍鬚洞。鳳凰池諸勝。

## 桃源山

桃源山在靖安縣西北四十里。勝概宛若武陵。上有仙姑壇。及龍鬚藥臼車廟等九洞。其水注下。南與毛竹礫水合。唐校書郎劉昫虛嘗居此。號爲孝弟鄉。或曰是宋支離翁劉子虛居址。相近爲石門山。山舊有寶峯院。唐權德輿有碑記。又有名山。洪芻祐聖院記云。右鶴嶺而左名山。長溪出焉。

### 魯溪山

魯溪山在武寧縣東北七十里。枕魯溪上。有石佛洞。幽邃嵌空。有樓閣宮闕之狀。峭壁環奇。龕象交列。有真仙古佛之容儀。雖絕世工巧。追琢不能及。

### 攝仙山

攝仙山在修水縣西七十里。中有二巖。巖各有穴。下有龍潭。相近爲巉巖。山中有四十餘穴。每天晴穴內風出。子午卯酉時尤盛。

### 龍門山

龍門山在修水縣東北三十里。洞穴玲瓏。寬廣可通行人。下有清水巖。多產蕙蘭。黃庭堅以爲天下絕勝處。

### 南山

南山在修水縣南二里。上圓下方。懸厓峭壁。下瞰修江。厓口有藏龍洞。下有釣磯及玉溜積雪石。

黃庭堅墓

黃庭堅墓在修水縣西二十五里雙井。庭堅字魯直。號山谷道人。宋分寧（即修水）人。幼警悟。舉進士。官葉縣尉。紹聖初。出知鄂州。章敦蔡汴惡之。貶涪州別駕。徽宗初。知太平州。復謫宜州。卒。庭堅性篤孝。與張來、晁補之、秦觀俱遊蘇軾門。天下稱爲四學士。而庭堅尤長於詩。稱大家。世以之配軾。號爲蘇黃。其行草亦有名於世。



鄱陽舞



上海图书馆藏书



A541 212 0018 9753B

